


ANG DAPIT NGA GIPILI SA DIOS SA PAGSIMBA

 Magpabilin ta sa pagtindog sa makadiyut samtang atong iduko ang atong mga ulo alang sa pag-ampo. Ug karon, uban sa atong mga ulo nga giduko, ug nagasalig ako nga ang atong mga kasingkasing miduko, usab, pila kaha ang ania niining gabhiona nga buot magpahinumdom sa pag-ampo, bahin sa espesyal nga butang? Mahimo bang iisa lamang ang imong kamot, moingon, “Dios, ihatag kanako niining gabhiona ang akong gipangita.” Ang Ginoo magapanalangin kaninyo.

² Langitnon namong Amahan, samtang nagaduol kami karon nga mapinaubsanon niining dakung Trono sa kalooy, pinaagi sa pagtoo, nagapaingon kami ngadto sa Langitnong-Dapit; diin ang Dios, ug ang mga Manulonda, ug ang mga Querubin, ug ang tanan nga Langitnong panon nanagkatigum. Tungod kay nagaingon Siya nga walay bisan usa ka maya nga mahulog sa yuta nga wala mahibalo-i sa Langitnong Amahan. Unsa pa kaha nga nahibalo Siya nga dinhi adunay gatasan ka mga tawong nagduko sa ilang mga ulo, ug nagatawag Kanimo alang sa espesyal nga mga hangyo. Amahan, sud-onga kining kalibutan nga nanginahanglan karong gabhiona, tungod kay kami mga tawong nanginahanglan.

³ Ug nagaampo ako, Dios, ingon nga nagkatigum kami dinhi ug ginapahayag Kanimo ang among pagtoo sa buhing Dios Nga mao’y nagatubag sa mga pag-ampo; migula kami gikan sa kalibutan nga mga wala nacircuncion, sa kasingkasing ug mga igdulogog, nanggula aron nga ikinabuhi ang usa ka gihimulag nga pagkinabuhi, ug magkinabuhi nga ginapahayag ang among pagtoo Kanimo. Among gibayaw ang among mga kamot karong gabhiona, ug nagaingon, “Kami nanginahanglan.” Mahal nga Dios, tubaga ang matag hangyo nila.

⁴ Ug dayon, Amahan, nagaampo kami nga duawon Mo kami niining gabhiona diha sa Pulong. Mianhi kami alang sa pagpanton, alang sa pagsabot, aron kami masayod kong unsaon pagkinabuhi sa niining panahon karon; unsay lauman ngadto sa unahan, unsay pagabuhaton. Tungod kay, nahibalo kami nga ang Pag-abot sa Ginoo nagkahiduol na, sumala sa tanan nga mga ilhanan nga giingon nang daan sa mga propeta. Nagkahiduol na kami sa maong takna, Ginoo, sa dihang igahatag na ang hingpit nga kaluwasan ngadto sa Imong mga anak. Dios, tugoti kami, ang matag usa, nga maatua didto, Amahan. Hinaut nga walay ni usa ang dili-maapil. Mao kana ang among katuyoan sa pag-anhi

karon, Ginoo. Nahigugma kami Kanimo, ug naninguha kami sa pagpangandam alang nianang taknaa.

⁵ Makigsulti Ka kanamo, among ginahangyo pag-usab, niining gabhiona. Ug ayoha ang mga ma'y sakit. Ang tanang masakiton ug ang mga nanag-antus nga ania sulod sa bilding, nagaampo kami nga Imong ayohon sila, Ginoo; ug ilabina kanila nga adunay mga espirituhanong panginahanglan. Nagaampo kami nga Imong luwason ang matag kalag nga nahisalaag. Puna ang matag magtotoo sa Balaang Espiritu. Ug bag-oha ang kusog ug Gahum diha sa Imong matinoohong mga anak. Itugot kining mga butanga, Amahan. Daghan ang among ginapangayo, tungod kay gisugo Mo man kami sa pagpangayo, "pangayo og kadagaya, pangayo alang sa dagkung mga butang, daghan kanila," aron ang among kalipay mamahingpit. Ug among ginapangayo ang mga niini sa Ngalan ni Jesus Cristo. Amen.

Makahimo na sa paglingkod.

⁶ Sa tinud-anay akong giisip kini nga usa ka dakung pribilihiyo karong gabhiona, nga makabalik dinhi sa intablado pag-usab, dinhi niining hataas nga tulonghaan, aron sa pag-atubang niining maayong mga tawo nga nagakatigum aron sa pagpaminaw sa Maayong Balita. Nagaampo ako alang sa kalooy sa Dios aron tabangan ako nga isulti kaninyo ang Kamatuoran sumala sa nahibaw-an ko nga Kamatuoran. Siya makahimo sa gihapon sa pagpatak-um sa baba sa usa ka tawo, sama nga mahimo Niya sa baba sa leon. Ug kung makalitok man ako og unsa mang butang nga sayup ug supak sa Iyang kabubut-on, ang akong sinserong pag-ampo mao nga Iyang tak-umon ang akong baba, nga dili ko kini masulti. Tungod kay, sa tinud-anay, gusto kong makaadto sa Langit, mismo; ug dili gyud ako makaadto kung ingon-ana, ug, walay labot niana, mamahimo pa gyud ko nga usa ka mini nga lider, usa ka tawo nga mibuhat og sayup. Kong mabuhat ko man kini, tungod kana nga wala ko mahibalo sa kalainan. Ang Ginoo magapanalangin kaninyo.

⁷ Karon, ugma sa buntag, kong kabubut-on sa Dios, akong giplano nga hisgotan kanang hilisgotan nga, *Kaminyoon Ug Panagbulag*. Ug, nagalaum kami nga moanhi kamo, ug magdala sa inyong mga lapis ug mga papel. Dili ta kaayo magdugay, apan buot ko lang . . . Mao kana ang akong tuyo sa pagbalik dinhi, sa Indiana, una, nga akong gisaad kana kaninyo. Ug akong paninguhaon, ugma sa buntag. Kon dili ko kini mahimo ugma sa buntag, buhaton ko ugma sa gabii. Apan akong paninguhaon ugma sa buntag, kung itugot sa Ginoo, aron sa paghisgot niana nga hilisgotan, ang duha ka mga tulonghaan sa maong mga panghunahuna. Ug hinaut nga tabangan kita sa Dios nga masayran kung unsa ang Kamatuoran, ang mahibaw-an ra gyud ang Kamatuoran, aron makalakaw kita diha sa Kamatuoran ug Kahayag. Kita . . .

⁸ Nahibalo ba mo, aduna ko'y usa ka tigulang nga negrong higala kaniadto. Miingon siya nako, ingon niya, "Igsoong Billy," ingon niya, "ako—dili ko man gud gusto nga magkaaduna pa'y problema didto sa suba." Ingon niya, "Gusto nako nga dala ko na ang akong ticket. Ug kung motingog na ang pito, dili ko gusto nga magkaaduna pa og unsa man nga problema didto. Akong gipangayo sa Ginoo, dugay na kaniadto, nga kung anaa ma'y sayup, tugotan Niya ako nga husayon kini karon dayon," ingon pa, "tungod kay mamahimong mangitngit ug mabagyohon nianang buntaga sa dihang mobiya na ang barko paingon sa pikas." Ingon pa, "Dili ko gusto nga adunay unsa man nga kakulian. Gusto nakong sulbaron ang tanan niini karon na." Mao kana kon ngano nga ania kita, naninguha nga sulbaron ang tanan nga mamahimong mga kakulian, aron nga kita makasakay na nianang taknaa.

⁹ Karon, dili ako magdugay sa pagpakighisgot kaninyo niining gabhiona, tungod kay adunay atong duha pa ka mga buluhaton ugma. Ug unya mogikan dayon ako, ngadto, sa lain nga, dugang mga buluhaton.

¹⁰ Apan, karon, diha sa Basahon sa Deuteronomio. Gusto kong mobasa gikan sa ika-16 nga kapitulo, unang tulo ka mga bersekulo, sa Deuteronomio 16:1 hangtud 3.

Saulogon mo ang bulan sa Abib, ug bantayi ang pasko . . . as GINOO nga imong Dios: . . . kay sa (ikaupat) nga bulan sa Abib gikuha ikaw sa GINOO nga imong Dios gikan sa—gikan sa Egipto sa gabii.

Ug maghalad ka sa pasko sa GINOO nga imong Dios, gikan sa mga carnero ug sa mga baka, sa dapit nga pagapilion sa GINOO nga papuy-an sa iyang ngalan.

¹¹ Karon, ang akong hilisgotan niining gabhiona mao: *Ang Dapit Nga Gipili Sa Dios Sa Pagsimba.*

Kong inyong namatikdan, ang bulan A-b-a-d . . . -b dinha, nagapasabot, og, "Abril." Ang bulan sa Abril mao'y panahon nga gidala sila pagawas.

Ug karon ang butang nga katingalahan mao nga kita niining gabhiona, ingon nga mga magsisimba sa Dios, sa niining panahona nga atong gikapuy-an, atong mahibaloan ang nagkalainlaing mga panghunahuna sa mga tawo. Ug samtang adunay nagakalainlaing mga panghunahuna bahin sa usa ka butang, aduna gyu'y nagkalainlaing mga pangutana; aduna pud og usa lamang ka hustong tubag sa matag pangutana nga gipangutana.

Kung ako mangutana sa pangutana nga, "Unsa man *kini*?"

"Bueno," moingon sila nga, "usa ka pulpito."

"Para man sa unsa *kini*?" Kita n'yo?

¹² Karon, diha, tingali'g adunay usa nga moingon, “Dili kana pulpito. Tabla kana.” Bueno, tabla kini, pero pulpito kini. Nakita n'yo, kinahanglan aduna gyu'y hustong tubag alang niini.

Ug kung mangutana ako bahin sa bisan unsang butang, siguradong aduna gyu'y usa ka hustong tubag. Mahimong adunay butang nga haduol niini; apan aduna gyu'y usa ka husto, ug laktud nga tubag sa matag pangutana. Mao, nga, sa matag pangutana nga nagaabot sa atong mga kinabuhi, aduna gyu'y usa ka matuod, husto nga tubag.

¹³ Ug sa karong, panahon, atong madungog—madungog kining ginaingon, sa kadaghanan sa kalibutan karon. . .

Ingon nga usa ka misyunero, nga nakabiyaha na sa makadaghan latas sa kadagatan ug sa tibuok kalibutan, ako nang nahimamat ang daghang nagkalainlaing mga relihiyon, maingon sa Buddha, ug Mohammedan, ug mga Sikh, ug mga Jain, ug uban pa, sa mga relihiyon sa kalibutan. Ug unya dinhi sa atong kaugalingong Estados Unidos; ug sa uban pang langyaw'ng kanasuran, nahimamat ko usab tanan natong nagkalainlaing mga iglesia, sama sa atong mga kaglesiahan sa denominasyon, sugod sa unang Romano Katoliko, ug unya ngadto sa Griyego, ug uban pa, ug ang—ang nagkalainlaing tulomanon, ug hangtud ngadto sa. . . tanang denominasyon sa kapanahonan, sa siyam ka gatus ka nagkalainlaing mga Protestanteng denominasyon.

Karon, ang matag usa kanila, siyempre, makita mo ang ilang mga ideya, ug dili ko sila mabasol. Ang matag usa moangkon nga sila mao ang tinuod, nga anaa kanila ang kamatuoran. Ug ang mga tawong sakop nianang mga iglesia kinahanglan motoo niana, tungod kay ilang gitahan ang ilang—ilang kapaingnan, ang ilang destinasyong Eternidad, basi sa pagtulon-an nianang maong iglesia. Ug daku ang ilang panagkalahi, sa usa'g usa, hangtud nga kini miabot sa siyam ka gatus nga nagkalainlaing mga pangutana.

Busa, kay siyam man ka gatus ug sobra pa nga nagkalainlaing mga pangutana, siguradong aduna gyu'y usa ka hustong Tubag. Ug gusto ko alang kanato niining gabhiona, maingon nga naninguha ta nga makaadto sa Langit, ug aron makigtagbo sa atong Ginoong Jesus Nga mao'y atong gihigugma, buot kong susihon sa mga Kasulatan aron mahibaloan kana.

¹⁴ Karon, kung kini usa ka pangutana sa Biblia, nan kini adunay tubag sa Biblia. Dili kini angay'ng mogikan sa usa ra ka pundok sa mga tawo, gikan sa bisan unsa man nga mga magsisimba, o gikan kang kinsa man nga magtutudlo, o gikan sa unsa man nga denominasyon. Kini angay'ng direkta nga magagikan sa Kasulatan, diin dinha ang dapit nga tagboanan sa Dios, alang sa pagsimba. Ug sigurado, ingon nga Dios,

aduna gyud Siya’y usa ka dapit nga tagboanan, diin Siya nagapakigtagbo.

¹⁵ Karon, atong hingkaplagan dinhi nga sa Deuteronomio, diha sa sinugdanan, ginabalik ni Moises pagbasa ang Kasulatan, ang mga butang nga iyang giingon kanila, kung giunsa sila gipagawas sa Dios pinaagi og usa ka gamhanan, kusgan nga bukton, pagawas sa Egipto, ug gipalig-on una sila.

Sila’y gitawag “ang katawhan sa Dios” hangtud nga sila nakagawas sa Egipto, ug dayon gitawag na nga “ang iglesia sa Dios.” Tungod kay, ang iglesia usa ka panagtigum, o, sa tinuod, ang *iglesia* nagkahulogan nga “mga tinawag pagawas,” kadtong mga gipanagtawag pagawas. Ug nanggawas sila sa Egipto, aron mamahimong iglesia.

¹⁶ Karon gisultihan sila sa Dios, sa dihang sila . . . sa wala pa nila gitukod ang templo ug kung unsa man ang ilang gibuhat kaniadto, “Akong pilion ang dapit diin Ako pagasimbahon, ug Akong ibutang ang Akong Ngalan diha niini.” Ug mao kana ang bugtong dapit diin ang Dios makigtagbo kang bisan kinsa, kanang Siya Mismo ang nagpili. Siya ang nagpili sa Iyang dapit, ug kon diin ang Iyang dapit nga gipili, dinha Niya ginabutang ang Iyang Ngalan, ang ikaduhang bersekulo dinhi ang mao’y nagasulti kanato niana; Iyang igabutang ang Iyang Ngalan diha sa dapit nga Iyang gipili alang sa mga tawo nga mosimba Kaniya. Karon, ang butang lang niini mao nga, atong pangitaon kung hain kanang maong dapit.

¹⁷ Maingon nga adunay sobra sa siyam ka gatus nga nagkalainlaing mga ideya, ingon usab nga atong lagpasan ang tanang paganong mga relihiyon, ug hisgotan lang ang mahitungod sa Cristohanong relihiyon. Nga, ako aduna ma’y pagbati alang sa mga pagano, o wala unta ko miadto didto ug nakigsulti kanila. Apan, sayup sila. Ang Cristianismo mao lang ang relihiyon nga tinuod, ang Cristianismo. Ug akong ginasulti kana dili tungod kay ako Cristohanon; tungod kay, ako nagatoo nga kana mao ang Kamatuoran. Kini mao rang relihiyon nga husto.

¹⁸ Nakaadto na ako sa lubnganan diin ang puti nga kabayo ginapulihan sa matag upat ka oras. Diin, si Mohammad, ang bantugang pari ug—ug magtutudlo pagkahuman ni Cristo, nga gitooan nga usa kono ka propeta, ug, wala ako magduhaduha kung unsa siya kaniadto, pagkahuman mismo sa mga managsoon nga Maccabeo. Apan sa ilang . . . Siya namatay. Siya nagpahayag nga mabuhi kono siya pag-usab ug buntugon ang tibuok kalibutan. Karon, sa matag upat ka oras ilang ginapulihan ang mga magbalantay, ug kanunay adunay puting kabayo nga nagahulat sa iyang lubnganan. Sila, sulod sa mga duha na ka libo ka tuig, nagasige’g hulat kaniya nga mabuhi pag-usab ug buntugon ang kalibutan. Apan nakita ninyo . . .

¹⁹ Ug adto kamo kang Buddha; si Buddha nagkinabuhi kaniadto gatusan ka mga tuig na, mga kaluhaan ug tulo ka gatus ka mga tuig na ang milabay, ang dios sa—sa Hapon. Ug siya usa ka pilosopo, sama kang Confucius, ug uban pa.

Apan kini silang tanan, kining . . . mga magtutukod, ug uban pa, silang tanan nangamatay uban sa ilang pilosopiya, ug gilubong ug anaa na sa lubnganan.

Apan ang Cristianismo, nga gitukod ni Jesus Cristo, adunay lubnganan nga walay sulod. Siya ang mao rang Tawo nga mitindog kaniadto ibabaw sa yuta, ug nabuhi ug nag-ingon, “Ako adunay kagahum sa pagtugyan sa Akong kinabuhi ug buhion kini pag-usab.” Ug gibuhat Niya kini. Ug buhi Siya karon.

Ug nahibalo kita nga buhi Siya, tungod kay ania Siya uban kanato ug nagapamatuod sa Iyang Kaugalingon pinaagi sa pisikal nga mga ilhanan ug mga katingalahan, nga Iyang gisaad nga Iyang pagabuhaton aron nga ipakita kini. Maingon nga, usa ka Haligi nga Kalayo nga nag-una kaniadto sa mga anak sa Israel didto sa kamingawan, Kini nagauban usab kanato karon, nagpa-retrato pa gani Kini sa Iyang hulagway; samtang nagapamuhat og mga ilhanan ug mga katingalahan nga gisaad Niyang pagabuhaton Niini karong panahona, nakita nato nga ang tanang mga Pulong nga Iyang gisaad nahimong dayag na niining panahona. Busa, dili apil niini ang tanang uban pang mga paganong kalibutan. Ang Cristianismo ra kini!

²⁰ Karon, maingon nga adunay siyam ka gatus ug sobra pa nga mga pangutana kung hain makigtagbo ang Dios, “Siya nagapakigtagbo sa Methodist, o Siya nagapakigtagbo sa Baptist, ug Siya nagapakigtabo *niini*, ug *niana*, ug sa *uban*.” Karon, aduna gyu’y pangutana, busa ang matag usa kinahanglan nga mangita sa iyang kaugalingong kaluwasan nga ma’y kahadlok ug pagkurog.

Apan niining gabhiona akong paninguhaon sa pagpangita, ug pamatud-an diha sa Kasulatan kung asa gyud ang hustong dapit diin ang Dios makigtagbo ug magsimba kauban sa katawhan. Ug, kung mao man, nan mao gyud kana ang bugtong dapit diin Siya magapakigtagbo.

²¹ Karon, atong gikuha kini nga teksto gikan sa Deuteronomio. Kini usa ka Griyegong pulong nga adunay duha ka mga kahulogan, o, kini nagapasabot og, “duha ka mga balaod.” Ang Griyegong pulong, *Deuteronomio*, nagakahulogan og “duha ka nagkalahi nga mga balaod.”

Ug mao kana mismo ang aduna sa Dios, duha ka nagkalahi nga mga balaod. Ug ang usa niini mao ang balaod sa kamatayon, ug ang laing usa mao ang balaod sa Kinabuhi. Ang Dios adunay duha ka mga balaod. Ang pagsunod Kaniya, ug ang pag-alagad Kaniya ug ang pagsimba Kaniya, mao’y Kinabuhi;

ang pagsalikway Niini mao'y kamatayon. Adunay duha ka mga balaod sa Dios.

²² Karon, ang usa nianang maong sugo mao ang pag-... gipaila ngadto sa kalibutan, didto sa Bukid sa Sinai. Ang Dios naghatag kaniadto og balaod kang Moises ug sa Israel. Dili aron nga tabangan sila sa maong balaod, apan gitudlo lang kanila sa maong balaod nga sila makasasala. Sa wala pa kana nga panahon, wala sila masayod kung unsa ang sala, hangtud nga aduna na sila'y balaod. Dili mahimo nga adunay balaod nga walay silot. Ang balaod dili mahimong balaod, kung walay silot. Mao, nga, "Ang paglapas sa kasugoan sala, ug ang bayad sa sala mao ang kamatayon." Mao nga, hangtud wala pa sila gibuhatan sa Dios og balaod, walay kalapasan nga giisip kanila.

Kung walay balaod dinhi nga nagaingon nga dili ka makapadagan og kapin sa kaluhaan ka milya kada oras, nan makapadagan ka og kapin sa kaluhaan ka milya kada oras. Apan kung adunay balaod nga nagaingon dili mo kini puedeng buhaton, nan aduna gyu'y balaod ug silot nga nagpaluyo niini.

²³ Karon, ang kamatayon, ang balaod sa kamatayon, mao ang mga kasugoan nga gihatag didto sa Bukid sa Sinai, nga nagsulti sa tawo nga siya makasasala. Ug, ang paglapas sa balaod sa Dios, siya mamatay. Apan walay kaluwasan diha sa balaod. Ang... Usa lamang kini ka pulis nga mao'y magbilanggo kanimo; wala kini og unsa man nga magpahigawas kanimo.

Apan unya Siya naghatag og usa pa ka balaod, didto kini sa Bukid sa Kalbaryo, diin ang sala gipahamtang kang Jesus Cristo, ug didto ang silot gibayran na. Ug dili pinaagi sa... Dili sa balaod, "apan pinaagi sa grasya naluwas ka," pinaagi sa grasya sa Dios, pinaagi sa predestinasyon sa pagkahibalo nang daan sa Dios mahitungod sa imong pagkatawo.

²⁴ Karon atong makita kining duha ka mga balaod, ang Deuteronomio, nga nagahisgot sa maong duha ka balaod. Dihay duha ka mga balaod. Ang usa mao ang balaod sa kamatayon, ug ang laing usa mao ang balaod sa Kinabuhi.

²⁵ Aduna pu'y duha ka mga pakigsaad nga gihatag kaniadto sa katawhan. Atong hisgotan ang mahitungod sa mga niini sa buntag.

Ang usa sa mga niini gihatag kang Adam nga ma'y kondisyones, "kung buhaton mo *kini* ug kung dili mo buhaton *kana*," apan nalapas kana nga balaod. Si Adam, si Eva gilapas nila kana, didto sa tanaman sa Eden.

Dayon mibuhat ang Dios og ikaduhang pakigsaad, ug gihatag kana kang Abraham, ug kana nga balaod walay mga kondisyones. "Dili kini kung unsay imong nabuhat o kung unsay imong buhaton pa lang;" Siya miingon, "Gibuhat Ko na kini." Grasya kana. Mao kana ang balaod sa Kinabuhi. Gibuhat kana

sa Dios alang kang Abraham ug sa iyang Kaliwat sunod kaniya, nga mao, ang tanang Kaliwat ni Abraham.

Sumala sa giingon sa Biblia, “Pagaluwason ang tibuok Israel,” apan kana wala magpasabot nga mga Judio. Sama sa giingon ni Pablo, “Kanang Israel sa kinasuloran, o Israel sa panggawas.” “Panggawas,” sama sa atong gihisgotan na sa miaging gabii, kini mao kadtung mga kaliwat ni Isaac, pinaagi sa pagpakighilawas. Apan ang balaod nga iya sa Dios mao’y pinaagi kang Cristo, nga mao ang Harianong Kaliwat ni Abraham, nga, “pinaagi sa grasya ang tanang Israel giluwas.” Kana’y, “Ang tanan nga anaa kang Cristo luwas na,” tanan, ang ikaduhang pakigsaad sa Dios. Apan kining tanan naglandong lang kang Cristo.

²⁶ Karon matikdi ang ika-2 nga bersekulo. Ang ika-2 nga bersekulo dinhi sa Deuteronomio 16, “Magsimba diha sa dapit nga Akong gipili.” Karon kinahanglan nga simbahon n’yo ang Dios, ingon Niya, “Diha sa dapit nga Akong gipili,” dili nga gipili ni kinsa man, apan, “kung unsa ang Akong gipili.”

Karon, kung ang Dios nagpili ug usa ka dapit, nan angay lang kanato nga hibaloon kung unsay Iyang giingon bahin niini. Ug kung asa gyud kini? Gusto kong pangitaon kini, tungod kay, sa pagkatinuod, gusto ko nga simbahon Siya.

Ania kitang tanan dinhi, niining gabhiona, aron nga simbahon Siya. Naglingkod kita dinhi niining gabhiona, ingon nga Methodist, Baptist, Katoliko, Jehovah Witness, Christian Science, ug tanan na, apan kitang tanan aduna gyu’y ginapangita.

Gusto kita nga mahibalo sa Kamatuoran. Ang Biblia nag-ingon, “Mahibalo kamo sa Kamatuoran, ug ang Kamatuoran magahatag kaninyo sa kagawasan.”

Si bisan kinsa ka man, wala ka mahibalo kung unsay imong ginabuhat, dili ka masayod kung unsaon sa pagbuhat niini hangtud nga masayod ka kung unsaon pagbuhat niini; dili ka mahibalo kung unsaon sa pagbuhat hangtud nga mahibalo ka kung unsaon sa pagbuhat niini, diay. Kinahanglan nga mahibalo ka kung unsay imong ginabuhat ug kung unsaon pagbuhat niini.

²⁷ Nagapakita kini kanato nga ang Dios adunay usa ka dapit nga tigumanan alang sa Iyang mga magsisimba, diha sa usa mismo ka dapit. Nianang maong dapit, lamang, ang Dios makigtagbo sa Iyang mga magsisimba.

²⁸ Karon, usab, ang dapit nga Iyang gipili alang sa Iyang mga magsisimba, Iyang gipahayag nga dinha Niya ibutang ang Iyang Ngalan. Karon atong susihon ug pangitaon, pinaagi sa Kasulatan, kung asa kining maong dapit. Sa pagkatinuod, kung nag-ingon ang Dios nga Iyang igabutang ang Iyang Ngalan diha niining dapit nga Iyang gipili aron sa pagpakigtagbo sa katawhan ug mosimba kauban kanila . . . o sila mosimba Kaniya,

diay, siguradong makita gyud kini sa Biblia, tungod kay alang man kini sa tanang kapanahonan.

²⁹ Ug ang gamhanan ug walay pagkausab nga Dios dili gayud mausab. Ang tawo nagakausab. Apan mahimo ninyong isalig ang inyong kinabuhi sa bisan unsa man nga gisulti sa Dios sa unsa mang panahon, tungod kay kini mao ang Kamatuoran. Kini mao'y Kamatuoran. Tungod kay, mao ra kana ang bugtong butang nga mahimo kong saligan, ang Biblia. Tungod kay, mapakyas ang pulong sa tawo, apan ang sa Dios mao'y labing gamhanan.

Niining tuiga angay nga mahibalo ko og labaw pa kay sa akong nahibaloan sa miaging tuig. Kamo kinahanglan, usab, sa matag adlaw. Aduna kita'y kinutoban, mao nga nagauswag ang atong kahibalo.

Apan ang Dios walay kinutoban. Siya walay kinutoban. Ug, ingon nga walay kinutoban, dili Siya mag-uswag sa kahibalo. Siya'y hingpit, sa sinugdan pa lang. Ang matag desisyon Niya husto gayud.

³⁰ Ug ang paagi sa Dios sa pagbuhat sa usa ka higayon, Iya kanang buhatan hangtud sa kahangturan ang ingon niana sa gihapon, o nasayop Siya sa pagbuhat sa dihang gibuhati Niya kini sa unang higayon. Kung ang usa ka tawo moduol sa Dios alang sa kaluwasan, basi sa sukaranan nga iya Siyang gidawat, kini kinahanglan mapahigayon sa mao ra gihapon nga basihan sa matag higayon. Husto kana. Kung ang usa ka tawo moduol sa Dios alang sa Langitnon nga pagkaayo, ug gidawat siya sa Dios basi sa usa ka sukaranan, pagmoduol ang usa na usab ka tawo, kinahanglan Niyang dawaton siya sa samang paagi usab, o nasayop Siya sa diha nga Iyang gidawat ang unang tawo. Ang Dios nagbuhat og usa ka sukaranan nga basi niana pagatagboon Niya ang tawo. Nagbuhat Siya og sumbanan kung unsay Iyang pagabuhaton, unsaon Niya sa pagbuhat niini, ug kana'y pinaagi sa halad nga dugo sa usa ka nating carnero didto sa tanaman sa Eden. Ang Dios wala gayud, sa unsa mang panahon, nga Iyang giusab kini.

³¹ Nagdesisyon Siya kaniadto kung unsaon Niya pagluwas ang tawo. Atong ginapaningkamotan sa karon nga edukaron ang tawo diha niini; naninguha ta sa pagpaeskuwela kanila, naninguha sa pag-edukar kanila, naninguha nga himoong denominasyon, naninguha sa pagbuhat niining tanang matang sa mga butang; pasudlon sila, lamanohon sila, bautismohan sila, tanang uban pa nga paagi, pasudlon sila pinaagi'g sulat. Apan nagpabilin nga mao ra, sa gihapon, nga ang Dios nagapakitagbo sa tawo ilalum ra sa giula nga Dugo sa Cordero. Ang Dugo mao na'y paagi sa Dios sa sinugdanan, ug ang Dugo mao sa gihapon ang paagi sa Dios niining gabhiona. Maayo man ang pagbuhat og mga penitensya ug tanan niining mga butanga,

apan ang kaluwasan mao'y pinaagi lamang sa Dugo. Ang Dugo mao ra ang bugtong paagi nga gipili sa Dios aron sa pagluwas sa tawo, ug dili kini Niya mahimong usabon.

³² Si Job adunay mao ra gihapon nga butang. Nahibalo siya nga siya'y matarung, tungod kay nagalahad man siya og—og halad nga gikinahanglan sa Dios kaniya.

³³ Karon, susihon ta karon aron makita kung unsa nga dapit kini, ug ang dapit nga Iyang gibutangan sa Iyang Ngalan. Kinahanglan natong pangitaon kon diin Niya gibutang ang Iyang Ngalan. Unya dayon, pagnahibaloan na nato kung unsa nga Ngalan sa Dios ug kung asa Niya kini gibutang, nan aduna na kita'y dapit simbahanan pagnahikaplagan na nato kini.

Tanan kining mga butanga, siyempre, mga landong kini sa mga butang nga umalabot. Ang tanang mga kasugoan kaniadto nagalarawan daan sa mga butang nga umalabot.

³⁴ Sama ra, sa bulan nga mao'y landong sa adlaw. Kini ang mangalagad pag wala ang adlaw, sama ra sa Iglesia nga mao'y mangalagad kung wala ang A-n-a-k sa Dios. Kung wala ang Anak, ang mas ubos nga Kahayag, ang Iglesia, ang mga magtotoo, mao'y mangalagad sa Dios ug mao'y mohatag og Kahayag pagwala ang Anak. Apan pag-nagasidlak na ang adlaw, dili mo na makita pa ang bulan, tungod kay kini misalop na. Wala na kini magkinahanglan sa kahayag niini, tungod kay kini nagahatag lang man sa iyahang dili-direktang kahayag, gikan sa adlaw. Karon, sama sa bana ug asawa, sama sa adlaw ug bulan, mao usab ang Iglesia ug si Cristo.

³⁵ Karon atong nahibaloan, nga, kining mga butanga ingon nga usa ka landong ni Cristo. Ang matag halad, fiesta, ug tanang butang diha sa Daang Tugon, nagalandong daan kang Cristo; maingon nga makita n'yo ang landong sa salog. Karon ania kung asa nato kinahanglan pangitaon ang hustong dapit sa pagsimba, kana mao ang pagbalik sa Daang Tugon kung hain kini gihatag ug tan-awon kung unsa kini nga mga butang kaniadto.

³⁶ Karon, pagmakita n'yo ang landong diha sa salog, mahibalo ka kung kini lalaki, babaye, o mananap, o kung unsa man kini, tungod kay kini nagahatag og landong diha sa salog. Ug sa diha nga ang anino ming mubo, ang anino ingon nga negatibo; dili mahimong adunay negatibo kung walay positibo. Busa, sa dihang nagakaduol na ang positibo sa negatibo, ang negatibo mahiusa na sa positibo. Ug mao nga ang anino—ug ang positibo nagakahiusa na, ug mao kana ang nagapahimo niini nga positibo na.

Ug kung “ang tanang daang butang,” ingon pa sa Biblia, “diha sa Daang Tugon, mao'y mga landong sa mga butang nga umalabot,” kung ingon-ana si Cristo mao ang anino sa mga butang nga umalabot.

³⁷ Busa makita nato, pinaagi sa mga tipo sa Daan Tugon, kung asa gyud nga dapit ang Iyang gipili aron butangan sa Iyang Ngalan, ug aron . . .alang karon. Karon, maingon nga ang landong . . .anaa na sa salog, sa giingon ko na, mao ang negatibo, ingon nga usa ka tipo, busa kita, nga mga magsisimba, makita usab ang mga landong sa Daang Tugon nga nagakahanap na paingon sa positibo sa Bag-o.

³⁸ Karon, ang tanan nga mga fiesta kaniadto, ang mga adlaw sa pangilin, ang tanan nga tabernakulo, ang tanang kahoy, ang tanantanan sulod sa tabernakulo, ang tanang butang nagtipo kang Cristo. Ang tanan nga mga paghalad, tanan nga mga kasugoan, ang tanang butang nagatipo kang Cristo. Nahisgotan na nato kini, matag karon ug unya, dinhi sa tabernakulo.

Unya atong makita, pinaagi niini, nga ang matag kredo, iglesia, ug denominasyon nabiyaan na og ayo. Wala na gani kini sa lumba, bisan unsaon pa. Ang matag kredo, matag iglesia, matag denominasyon, hingpit nang nahibilin. Wala na'y nahibilin pang dapit alang kanila.

³⁹ Walay nahimong tipo diha sa Daang Tugon, o bisan diin sa Biblia, bahin sa iglesia, kondili ang pinugos nga pagkahiniusa didto sa tori sa Babel. Mao lang kana ang bugtong butang nga nagatipo sa maong panaghiusa. Tungod kay, pinaagi kadto kang Nimrod, nga usa ka tawong dautan nga miadto ug gipugos ang tanang magagmay'ng nasud sa pag-adto sa usa ka dapit ug ngadtong dakung tori. Usa kadto ka relihiyosong pagsimba, siyempre, apan dili sumala sa Pulong sa Dios. Busa dinha gitipo ang denominasyong relihiyon, sa tori sa Babel, diha sa Daang Tugon. Nga, kadto nga relihiyon usa man gud ka relihiyon, apan dili relihiyon nga iya sa Pulong sa Dios.

⁴⁰ Wala gipili sa Dios nga ibutang ang Iyang Ngalan diha sa bisan unsang denominasyon. Gusto ko og Kasulatan niini, kung mao man. Nahibalo ako nga nagaingon sila nga gibuhat Niya, apan wala gyud Niya gibuhat. Dili Niya mahimong ibutang ang Iyang Ngalan sa daghang mga dapit, tungod kay nag-ingon na Siya nga Iyang ibutang ang Iyang Ngalan diha sa usa ra ka dapit. Ug, kanang usa ra ka dapit, ang matag usa sa atong mga denominasyon gustong moingon nga sila kono kanang maong dapit, apan bali kini.

Apan asa gyud Niya gibutang ang Iyang Ngalan?

⁴¹ Karon, ug, Siya, unsa ba'y Iyang Ngalan, una gyud? Kinahanglan atong (Ngalanan) hibaloon kung unsay Ngalan sa Dios sa dili pa nato mahibaloan kung unsa nga dapit ang Iyang gibutang.

Karon, atong nahibaloan nga Siya adunay daghan nga mga titulo. Gitawag Siya nga . . .Siya gitawag nga "Amahan," nga usa ka titulo. Ug Siya gitawag nga "Anak," nga usa ka titulo. Siya gitawag nga "Espiritu Santo," nga usa usab ka titulo. Siya

gitawag nga “Rosas sa Saron,” nga usa ka titulo. “Lirio sa Kawalogan,” usa ka titulo, “Bitoon sa Kabuntagon.” “Jehovah-jireh, Jehovah-rapha,” pito ka nagkalainlaing, linangkub, nga matubsanong ngalan, ug kana silang tanan mga titulo. Wala ni usa sa mga niini ang ngalan.

Apan aduna Siya’y Ngalan.

⁴² Sa Iyang gitagbo Niya si Moises, wala pa Siya’y Iyang Ngalan kaniadto, ug Iyang giingnan si Moises, “AKO MAN ANG MAO AKO.” Ug sa dihang atong nakita si Jesus ibabaw sa yuta, nga gihisgotan diha sa Mga Hebreohanon sa ika-6 nga kapitulo. . . pasayloa ko, sa San Juan sa ika-6 nga kapitulo diay. Siya miingon, “AKO MAN ANG MAO AKO.”

Miingon sila, “Nganong, Ikaw usa ka Tawo nga wala pa mokapin sa kalim-an ka tuig ang kaguwangon, ug moingon Ka nga Imong ‘nakita si Abraham?’”

⁴³ Siya miingon, “Sa wala pa si Abraham, MAO NA AKO.” Ug “MAO NA AKO” ang Maong, nagdilaab nga kahoy’ng talongon, ang Haligi nga Kalayo nga diha sa nagadilaab nga kahoy’ng talongon kaniadtong mga adlaw ni Moises, ang “AKO MAN ANG MAO AKO.”

⁴⁴ Ug karon atong nahibaloan nga si Jesus miingon, usab, “Ako mianhi sa Ngalan sa Akong Amahan, ug wala Ako ninyo dawata.” Kung ingon-ana, ang Ngalan diay sa Amahan mao’y Jesus. Husto kana. Ang Ngalan sa Amahan mao’y Jesus, tungod kay mao man ang giingon ni Jesus. “Dala Ko ang Ngalan sa Akong Amahan. Ako mianhi sa Ngalan sa Akong Amahan, ug wala ninyo Ako dawata.” Kung ingon niana, ang Iyang Ngalan mao si Jesus.

Ug si Gabriel nagtawag Kaniya nga Jesus, ang mga propeta nagtawag Kaniya nga Jesus, ug Siya sa pagkatinuod mao si Jesus. Sa wala pa Siya ipanganak, bisan ang balaang propeta gitawag ang Iyang Ngalan nga *Emmanuel*, nga mao, “Ang Dios uban kanato.” Kung ingon-ana, “ang Dios nadayag diha sa unod, aron sa pagkuha sa sala sa kalibutan,” ug, sa pagbuhat sa Dios niana, Siya gihatagan sa Ngalan nga Jesus. Busa, si Jesus mao ang Ngalan.

Ug ang maong Ngalan gibutang diha sa usa ka Tawo; dili sa usa ka iglesia, dili sa usa ka denominasyon, dili sa usa ka kredo, kondili sa usa ka Tawo! Siya ang nagpili sa pagbutang sa Iyang Ngalan diha kang Jesus Cristo. Karon atong nahibaloan nga Siya nahimong dapit sa Dios sa pagsimba, diin mo Siya masimba.

⁴⁵ Bisan sa wala pa Siya matawo, ang Iyang Ngalan gitawag nang daan og Jesus. Mahinungdanon kaayo kadto, nga gihatag kini ngadto sa Iyang inahan sa Manulonda nga si Gabriel, nga ang Iyang Ngalan pagatawgon og “Jesus, nga Anak sa Dios,” kung unsa Siya kaniadto.

⁴⁶ Dinha nato makita, kung ingon-ana. Nga mao na kini, gayud. Kini mao'y, alang Kaniya lamang, ang dapit nga gipili sa Dios sa pagsimba. Ang dapit sa Dios, pinili. Gipili sa Dios aron tagbuon ang tawo; dili diha sa simbahan, dili diha sa usa ka denominasyon, dili sa usa ka kredo, kondili diha kang Cristo. Mao kana ang bugtong dapit nga ang Dios magapakigtagbo sa tawo, ug ang tawo makasimba sa Dios, diha ra kang Cristo. Mao kana ang bugtong dapit. Bisan pa kung Methodist ka, Baptist, Katoliko, Protestante, bisan unsa ka pa, adunay usa lamang ka dapit nga makasimba ka sa Dios sa hustong paagi, kana'y anaa ra kang Cristo.

Mga Taga-Roma 8:1, nag-ingon, “Busa sila nga anaa kang Cristo Jesus dili na karon mga hinukman sa silot, nga wala magalakaw sumala sa unod, kondili sumala sa Espiritu.” Mao kana ang Maayong Balita.

⁴⁷ Mahimong dili ta magkauyon diha sa mga kredo. Mahimong dili ta magkauyon diha sa mga binuhat-sa-tawo nga mga teorya. Makahimo ka sa pagtambong sa iglesiang Methodist, nga kinahanglan kang mahimong Methodist; Baptist, usa ka Baptist; Katoliko, usa ka Katoliko. Apan sa dihang nabautismohan ka na diha kang Cristo, ug nahimo nang sakop sa Iyang Lawas, wala na'y panagkalahi-lahi. Gibungkag na ang bongbong sa pagkabahin-bahin nga anaa sa tunga ug gawasnon ka na, tungod kay ikaw anaa na kang Cristo Jesus. Ug ikaw nagasimba na sa Dios diha sa Espiritu ug Kamatuoran pag-anaa ka na kang Cristo Jesus. Plano kini sa Dios nga simbahan mo Siya diha kang Cristo Jesus.

⁴⁸ Karon, walay iglesiang denominasyon ang puedeng moangkon niini, walay tawo ang puedeng moangkon niana. Ayaw gyud pangahas nga magbuhat og ingon ninan nga mga pangangkon? Ang pagbuhat og ingon niana nga butang usa ka espiritung anticristo, pagpangilog kini gikan kang Cristo; ang pagpangangkon gikan Kaniya. Dili mo kana mahimo. Si Cristo lang ang bugtong dapit diin ang Dios magapakigtagbo sa mga magsisimba.

⁴⁹ Sila ma'y mga ginaingon, karon. Adunay akong katawhan nga mosugilon kanako. Usa ka lalaki ang mitawag kanako dili pa lang dugay, nga taga-Beaumont, Texas. Ingon niya, “Mr. Branham, kung ang imong ngalan wala sa among libro sa iglesia, dili ka makaadto sa Langit.” Mahunahuna n'yo kaha kana? Ayaw gyud tohi ang ingon nianang butang. Nagtoo sila nga kinahanglan mamahimo kang sakop nianang usa ka iglesia o nga dili ka makaadto sa Langit. Sayop kana. Ang pagtoo niana, anticristo. Akong isulti kini: kung motoo ka sa ingon-ana nga espiritu, malaglag ka. Usa kana ka klarong ilhanan nga ikaw nahisalaag, tungod kay pag-ilog kana sa kung unsay gibuhay sa Dios. Ang Dios wala gyud nagbutang sa Iyang Ngalan diha sa bisan unsang iglesia. Iyang gibutang Kini diha sa Iyang Anak,

si Cristo Jesus, sa dihang Siya ug ang Iyang Anak nahimong Usa. Mao kana ang tinuod nga dapit sa pagsimba. Walay laing patukuranan ang gikapahimutang, walay laing bato.

Diha kang Cristo, sa Batong malig-on, ako
nagabarug;
Ang tanang uban pang tukuranan mga balas
nga nagakaunlod.

Ang mga denominasyon malumpag ug mapukan, ang mga nasud mangahanaw, apan Siya magapabilin hangtud sa kahangturan. Walay laing dapit nga mahimong hikaplagaan sa usa ka tawo, aron sa pagsimba sa Dios, nga motubag ang Dios kaniya, walay laing dapit kondili diha ra kang Cristo Jesus. Mao kana ang bugtong dapit, ang bugtong dapit nga gipili sa Dios aron butangan sa Iyang Ngalan, ug ang bugtong dapit nga dinha Niyang tagboon ang tawo, aron sa pagsimba. Malaglag ka, kung motoo ka sa lain pang butang.

⁵⁰ Matikdi, ang tanang pito ka mga Judiong fiesta gisaulog diha sa mao rang dapit. Wala gyud sila nagsaulog og usa ka fiesta *dinhi* alang sa Methodist, ug usa na usab *dinhi* alang sa Baptist, usa *didto* alang sa Presbyterian, usa *dinhi* sa luyo alang sa Katoliko, ug usa alang sa Protestante. Ang tanang pito ka mga fiesta gisaulog diha sa usa ra ka dapit.

⁵¹ Usa kini ka matahum kaayo nga tipo *dinhi*. Dili pa lamang dugay nga natapos nato ang Pito ka mga Kapanahonan sa Iglesia, nga nagapakita nga gipapabilin sa Dios ang tanang Pito ka mga Kapanahonan sa Iglesia diha sa Pulong, tungod kay naghatag ang matag kapanahonan sa iglesia og usa ka bahin sa Pulong, ug sa matag panahon nga ila kining gihatag nakita nila ang Kahayag.

Sama ra sa mga tawo nga unang nakakaplag nga ang bautismo kinahanglan sa Ngalan ni Jesus. Unsa'y ilang gibuhat? Nagbuhat sila og denominasyon gikan niini, ug kini namatay dihadhi mismo. Dayon ang Dios mibiya paingon sa laing tawo. Dili gyud Siya mopabilin diha nianang mga kredo ug mga dogma. Wala Siya'y kahilambigitan niana. Wala man gud bisan unsa man nga hiwi sa Dios. Ang Pulong sa Dios balaan, walay sagol. Si Cristo mao ang pinakasentro sa pagsimba sa Dios. Siya mao ang Dios.

⁵² Ang tanang pito ka mga fiesta kinahanglan igapahigayon *dinhi* niining usa ra ka dapit. Dili mo mahimong saulogon ang fiesta sa bisan hain nga dapit. Apan silang pito, ang dapit. . . Ang pito ka mga fiesta sa tuig kinahanglan pagasaulogon diha sa usa ra ka dapit. Busa, ang Pito ka mga Kapanahonan sa Iglesia kinahanglan magagikan sa usa ra ka dapit, si Cristo kini nga nagasulti diha sa tanang Pito ka mga Kapanahonan sa Iglesia. Husto gyud kana. Tipo, sa Pito ka mga Kapanahonan sa Iglesia, apan nanagtukod sila og mga denominasyon gikan niini.

⁵³ Karon atong tan-awon ang lain pang tipo samtang ania pa kita dinhi, kana mao'y tipo sa pasko, nga nagalarawan kang Jesus. Dinhi atong namatikdan ang paghalad sa dugo, pinaagi'g kamatayon. Ang paghalad og dugo mao ang dapit nga nagalarawan daan kang Cristo. Makahimo ba sa pagdugo ang denominasyon; mahunahuna mo ba nga usa ka iglesiang nagkadugo, usa ka denominasyon nga nagkadugo? Siguradong wala. Nagkinahanglan kini og dugo, nga modugo gikan sa kinabuhi. Ug, ang kinabuhi, ania si Jesus nga nagaabot ingon nga carnero. Ang carnero usa ka tipo ni Cristo, ug nagalarawan kang Cristo, tungod kay Siya mao "ang Cordero sa Dios," nga gipaila ni Juan, "nga mao ang magkuha sa sala sa kalibutan." Atong makita si Jesus nga ginalarawan, dinhi sa Exodo sa ika-12 nga kapitulo.

⁵⁴ Matikdi, mao lamang kadto ang dapit nga ang kamatayon dili makaanha. Sa dihang hapit na ang kamatayon moigo sa yuta, kinahanglan nga aduna gyu'y usa ka dapit; ang tanan man gud nga wala mailalum niini mamatay. Usa ra gyud ka dapit! Karon, wala kini magpasabot nga usa kadto ka balay; apan dihay usa ka dapit, nga dinha ginapatay ang carnero. Kon diin anaa ang dugo sa nating carnero, dili makaanha ang manulonda sa kamatayon, tungod kay mao kadto ang usa ka dapit nga gibutangan sa Dios sa Iyang Ngalan. Ug kadtong nating carnero gihinganlan na sukad pa sa sinugdan, usa ka nating carnero. Matikdi, mao kadto ang usa ka dapit nga dili makahampak ang kamatayon.

⁵⁵ Ug karon sama sa gihapon ning adlaw. Adunay usa lamang ka dapit nga ang espirituhanong kamatayon dili makahimo sa paghampak, kana mao ang Pulong. Ang kamatayon dili makahampak sa Pulong, tungod kay Kini mao ang buhing Pulong sa Dios.

Apan kung imong butangan Kini og mga kredo, ang Pulong mobiya Mismo. Kini molain sama sa tubig ug sa lana. Dili mo kini mahimong sagulon. Busa, inyong makita, sa panahon nga ang kredo mosulod diha sa denominasyon, silang tanan mokuyog sa kredo; ug ang Pulong mamatay, ug moadto sa laing tawo ug moushaw pa Kini og dugang. Magkakusog pa ang lihok, sa diha nga Kini magapadayon gikan sa pagpamatarung, pagpabalaan, bautismo sa Espiritu Santo, ug paingon ngadto sa Liso! Nakita ba ninyo ang dalan nga giagian sa Dios? Ginadala ang Iyang Ngalan, sa tanang panahon, nga nagapadayon sa mao ra nga pamaagi, tungod kay Siya mao ang Pulong.

Matikdi, Kini dili mamatay. Ang Pulong sa Kinabuhi dili gayud mamatay.

⁵⁶ Matikdi kung unsa ka hingpit, karon. Ang manulonda sa kamatayon kaniadto wala babagi sa paghampak sa mga bantugan ug manggialamong tawo sa Egipto. Wala kini babagi

sa paghampak sa bililhong mga yuta niini, ang mga dagkung balay niini, ang mga paraon niini. O, ang mga pari sa yuta, ang manulonda wala gayud babagi sa paghampak. Makahimo kini sa paghampak sa bisan asang balay, sa bisan unsang dapit, kang bisan kinsa, apan dili kini makahimo sa paghampak diin didto ang nating carnero.

Ang kamatayon dili makahimo sa paghampak diin atua kining giandam nga dapit sa Dios, ug kana ang anaa sa Cordero.

⁵⁷ Himatikdi, bisan gani ang...wala siya gidid-an sa paghampak sa Israel o sa mga sacerdoteng Hebreohanon, ug, o bisan unsa sa ilang mga denominasyon. Ang tanan kinahanglan anaa sa gipili sa Dios, gikataganang dapit, kay kon dili igoon gyud siya sa kamatayon.

⁵⁸ Iglesia, bisan asa ka pa, unsay imong gipamiyembrohan, walay sapayan kini alang kanako. Apan, adunay usa lamang ka butang nga angay mong mahibaloan, kinahanglan nga maanaa ka kang Cristo o mamatay ka. Dili ka mabuhi nga gawas Kaniya. Tingali maayo man ang imong iglesia, maingon nga usa ka bilding; tingali maayo man ang imong pagpakig-fellowship, ingon nga tawo. Apan sa diha nga imong ilimod ang Lawas, ang Dugo, ang Pulong ni Jesus Cristo, mamatay ka sa mismong takna nga buhaton mo kini. Kini mao ang dapit nga gipili sa Dios sa pagsimba. Dinha mismo napahimutang ang Iyang Ngalan, eksakto. Dinha mismo ang lugar nga Iyang gipili aron ibutang ang Iyang Ngalan; dili diha sa simbahan, kondili diha sa Anak, kang Jesus Cristo.

⁵⁹ Matikdi, anaa lamang ang kaluwasan diha sa dapit nga Iyang gipili, diha sa Iyang nating carnero, ug diha sa ngalan sa nating carnero.

⁶⁰ Matikdi, usa kadto ka “lalaki” nga carnero, usa ka laki, dili usa ka baye. Dili usa ka iglesia, ingon nga babaye; kondili sa Iyang Ngalan, dili sa ngalan sa babaye. Ang lugar diin Siya makigtagbo sa mga tawo dili sa ngalan sa babaye, kondili sa Iyang Ngalan, sa Lalaki, ang Cordero!

⁶¹ Karon kita nagaingon, “Ang iglesia, ang bantugan, gamhanan nga iglesia, iyang gibuhat *kini* ug iyang gibuhat *kana*. Gipakigbisogan niya ang mga bagyo. Nagkadaghan kami. Daghan kaayo mi og mga miyembro. Kami usa ka gamhanang iglesia. Siya’y usa ka bantugan nga iglesia.”

Apan ang Dios wala gyud maghisgot og unsa man bahin sa usa ka babaye. Siya miingon, “Lalaki.” “Lalaki,” ang mao’y dapit nga tagboanan, ang Cordero, dili ang iglesia. Dili sa ngalan sa babaye, kondili sa Iyang Ngalan. Wala Niya ibutang ang ngalan sa babaye bisan diin. Iyang gibutang ang Iyang Ngalan diha “Kaniya”!

Mao kana kon nganong, “Ang tanan kinahanglan natong buhaton, sa pulong man o sa buhat, kining tanan kinahanglan

natong buhaton sa Ngalan ni Jesus Cristo.” Kung mag-ampo ta, kinahanglan nga mag-ampo ta sa Ngalan ni Jesus. Kung mangamuyo ta, mangayo ta sa Ngalan ni Jesus. Kung maglakaw ta, maglakaw ta sa Ngalan ni Jesus. Kung mosulti ta, mosulti ta sa Ngalan ni Jesus. Kung magabautismo ta, kinahanglan nga magbautismo ta sa Ngalan ni Jesus Cristo. Tungod kay, “Tanan nga atong pagabuhaton sa pulong ug sa buhat, buhata kini sa Ngalan ni Jesus Cristo.”

⁶² Usa ka lalaki ang miingon kanako usa niana ka higayonn, nga nakighisgot niana, ingon niya, “Igsoong Branham, ang akong asawa, dili ko...” Ingon niya, “Ang asawa ko, ang iyang ngalan mao si mao’y *Ingon niini-ug-ingon niana.*” Usa ka ministro ang maong lalaki, tingali’g ania siya karon nagalingkod. Ug ingon niya, “Ang akong asawa,” ingon pa, “dala niya ang akong ngalan.” Ingon ko lang nga *Jones*, tungod dili man *Jones*. Ingon niya, “Karon, dili na kinahanglan nga mobangon siya matag buntag, mokuha’g silhig ug moingon, ‘Karon silhigan ko ang salog sa ngalan ni *Jones*, ug akong hugasan ang mga plato sa ngalan ni *Jones*, ug patsingan ko ang mga sinina sa ngalan ni *Jones.*” Ingon niya, “Sa tan-aw ko dili na kinahanglan pang motawag sa kang bisan kinsang ngalan.”

Ingon ko, “Nagtoo ko nga kinahanglan mo.” Husto kana.

Ug ingon niya, “Bueno, ngano man? Dili man kinahanglan nga isulti pa niya kini. Nga bisan unsay iyang buhaton kinahanglan sa ngalan gyud ni *Jones*, sa sugod pa lang.”

⁶³ Ingon ko, “Apan wala man ka miadto lang sa dalan ug basta na lang siya gikuha, ug miingon, ‘Dali ngari, *Jones.*’ Kinahanglan nga mahimo una, siya, pinaagi’g seremonyas, usa ka seremonyas sa kaminyoon, nga ‘*Jones.*’ Kay kung dili, nan nag-ipon kamo nga nagapanapaw. Ug kung nabautismo kamo sa bisan unsa nga paagi nga dili sa Ngalan ni Jesus Cristo, usa kini ka bautismo sa pagpanapaw, nga dili gyud makita sa Biblia.”

Dayon, “Unsa ma’y imong buhaton sa pulong ug sa buhat, buhata kining tanan sa Ngalan ni Jesus.” Subay niana, buhata kung unsa ma’y imong pagabuhaton! Apan una gyud, nadawat mo na ang Iyang Ngalan.

⁶⁴ Adunay daghang mga maayong kababayan-an dinhi niining tigumanan karong gabhiona, buotan, matinud-anong mga babaye; apan adunay usa lamang ka Mrs. William Branham. Siya ra ang usa nga nagakuyog pauli uban kanako. Siya ra kanang usa nga akong asawa.

⁶⁵ Adunay mga maayong tawo sa kalibutan, mga maayong kaiglesiahan; apan adunay usa ra ka Mrs. Jesus Cristo, ug mao kana ang Iyang pagabalikan. Mao kana ang gibutangan sa Iyang Ngalan. Diha niana ang Iyang pagsimba, diha Kaniya ug Kaniya lamang. Tinuod kana. Oh, oo, sir. Atong nahibaloan kana nga mao’y tinuod.

66 Karon, mao kana kon ngano, nga kita, “Tanan nga atong buhaton sa pulong o sa buhat, atong buhaton kini sa Ngalan ni Jesus Cristo.”

“Walay laing ngalan nga gihatag ilalum sa Langit alang sa kaluwasan, gawas sa Ngalan ni Jesus Cristo.” Mga Buhat, sa ika-2 nga kapitulo, nagaingon nga, “Kinahanglan mahibaloan ninyo. . .” “Walay laing ngalan nga gihatag ilalum sa Langit nga pinaagi niini ang tawo maluwasa, sa Ngalan lamang ni Jesus Cristo.” Amen. Nanghinaut ako nga nakuha ninyo kini. Sa Ngalan ra ni Jesus Cristo, ang matag. . .

Ang Kahitas-ang Langit gitawag sa Iyang ngalan, “Ang matag-usa ka banay sa Langit gitawag sa ngalan ni Jesus,” nagingon ang Biblia, “ug ang tanang banay sa yuta gitawag sa ngalan ni Jesus.” Busa mao kana ang gipili sa Dios nga Ngalan ug dinhi niini Iyang gibutang Kini. Mao kana ang Iyang dapit sa pagsimba, mao’y anaa kang Jesus Cristo. Karon, nasayud ta nga mao gayud kana, wala na’y laing dapit sa pagsimba kondili Kaniya.

67 “Kay wala na’y lain pang ngalan sa silong sa Langit nga gihatag sa tawo, nga pinaagi niini mamaluwas sila.” Siya ang Ngalan sa Dios sa pagtubos. Ang Dios adunay ngalan nga gitawag og Jehovah-jireh, Jehovah-rapha. *Jehovah-jireh*, “ang Ginoo nagapasaylo sa tanan ninyong mga kasal-anan.” *Jehovah-rapha*, “ang Ginoo nagaayo sa tanan ninyong balatian.” Aduna Siya’y daghang mga titulo. Apan aduna Siya’y usa lamang ka Ngalan sa pagtubos, nga kana’y alang sa tawo, ug mao kana ang Ngalan ni “Jesus.” Mao kana ang Iyang Ngalan, nga Iyang gipili nga butangan. Asa Niya Kini gibutang? Iya Kining gibutang diha kang Cristo.

68 Ang tanang uban pang mga ngalan sa iglesia, sa mga kredo, mga titulo, makamatay ang pagsalig kanila. Kung nagasalig ka sa iglesiang Methodist nga mao’y modala kanimo sa Langit, malaglag ka. Kung nagasalig ka sa Pentecostal, sa Pentecostal nga iglesia nga mao’y modala kanimo sa Langit, malaglag ka. Ug ang Baptist, Lutheran, Presbyterian, Katoliko, bisan unsa pang ubang iglesia, kung nagasalig ka sa ilang ngalan, o sa ilang titulo, o sa ilang kredo, malaglag ka.

Tungod kay, dili ka man gani makasimba hangtud nga nakaduol ka una sa maong dapit sa pagsimba. Amen. Mao kana ang bugtong dapit diin ang Dios nagapakitagbo sa magsisimba, ang dapit nga Iyang gipili aron butangan sa Iyang Ngalan. Ang tanan pang uban, pagmosalig mo kanila, mamatay kamo. Siya usab. . .

69 Ania pa’y lain landong ni Jesus dinhi, nga akong gimarkahan, sa Kasulatan. Usab, Iyang—Iyang ginalarawan daan dinhi, “Siya kinahanglan nga walay buling.” Ang dapit

nga gibutangan sa Dios sa Iyang Ngalan, kining maong nating carnero kinahanglan nga walay buling.

Karon, unsa man nga denominasyon o sistema diin inyo kining mahimong ilambigit; unsa nga iglesia, Katoliko, Protestante, Judio, bisan unsa pa kini? Unsang sistema, denominasyon, nga mahimo ninyo kanang ilambigit, nga “walay buling diha niini”? Igasalikway gyud kining tanan, ug dili gyud puede!

Apan adunay usa ka dapit! Alleluyah! Kanang maong dapit anaa kang Jesus Cristo. Wala gyu’y buling diha Kaniya. Wala gyu’y sayup diha Kaniya.

Dili mo kini mahimong ilambigit. Kining tanan nga mga tawo nga nagasulay sa pagbuhat niini, moingon nga ang ila konong iglesia walay sayup ug tanan na *niini*. Pero kini ang mahugaw, masinupakon sa Pulong, mahigugmaon, patay, Laodiceanhong, kredo, ug dili kini ang Kamatuoran. Apan bisan si Pilato mismo, ang Iyang kaaway, miingon, “Wala ko’y makaplagan nga sayup diha Kaniya.” Ang Iya Mismong kaaway nagpamatuod nga walay sayup diha Kaniya. Walay bisan unsang sala ang mahimo n’yo ipasangil diha Kaniya.

⁷⁰ Siya miingon ngadto sa Iyang mga adlaw, “Kinsa ba kaninyo ang makapasangil Kanako og sala? Kinsay makapakita Kanako nga Ako makasasala?”

Suginli ako sa usa ka iglesia nga makaingon nga sila wala gyu’y nabuhat nga sayup. Sa prangka lang, wala gyu’y bisan usa kanila, halos, apan nagpamatay pa gani ug gibuhat mismo ang tanan nang anaa sa listahan sa mga mahimong buhaton, halos. Dayon tawgon sa gihapon ang ilang kaugalingon. . . Busa dili kini ang dapit sa Dios nga tagboanan sa pagsimba, ang unsa man nga kredo o denominasyon.

⁷¹ Mga higala ko, dili ako gusto magpasakit og pagbati, apan aduna ko’y tulobagon nga usa ka Mensahe, ug, kanang maong Mensahe mao’y, “Panggawas kamo gikan nianang kaguliyang!” Ug kung ginasultihan ko kamo nga manggula, asa ko man kamo dad-on? Dad-on ko ba kamo ngadto sa Branham Tabernacle? Kini nga ingon usab ka masalaypon sama sa tanang uban pa kanila.

Apan adunay usa ka dapit nga mahimo ko kamong dad-on, diin niini kamo luwas ug protektado sa kamatayon, kana’y anaa kang Jesus Cristo, ang dapit sa Dios sa pagsimba. Mao kana ang dapit nga akong ginapaila kaninyo, niining gabhiona, diin gibutang sa Dios ang Iyang Ngalan. Diin Siya nagsaad nga makigtambo Siya sa matag tawo nga nagasulod niini, Siya makigsimba uban kaniya ug makig-fiesta uban kaniya, kana’y anaa kang Cristo; dili sa kung unsa nga simbahan, sa kung unsa nga tabernakulo.

Kondili, diha kang Cristo, Siya mao ang Tabernakulo sa Dios. Siya mao ang dapit nga gisudlan sa Dios, ang Dios Mismo, ug mipuyo diha sa sulod Niya. “Mao kini ang Akong Anak nga pinalangga, nga Kaniya nahimuot Ako sa pagpuyo.” Dinha ang Dios nag-tabernakulo, gidala ang Iyang Ngalan ug gibutang Kini, diha kang Jesus Cristo. Busa, ang Iyang Ngalan gibutang diha sa usa ka Tawo, sa Iyang Anak, nga si Jesus Cristo, nga sulod niini Siya nagtabernakulo sa Iyang Kaugalingon, ug diha nianang maong Tabernakulo.

Diin nga, diha sa pagtipo, ang karaang Jerusalem, ang karaang mga fiesta, ang karaang templo, mao’y tipo; sa dihang misulod ang aso, niadtong adlaw nga gisulod ang arka, sa tugon, ug napahiluna na didto, ug nadungog ang Tingog sa Dios gikan niini.

Mao usab nga ang Tingog sa Dios madungog, gikan sa Tabernakulong, Jesus Cristo; nga, ang Daan (ang natural) mao’y tipo ug landong sa Bag-o. Ug sa Iyang pagsulod diha kang Cristo, Siya miingon, “Mao kini ang Akong Anak nga Pinalangga, nga Kaniya nahimuot Ako sa pagpuyo. Ug pagapilion Ko ang dapit nga Akong butangan sa Akong Ngalan, ug diin Ako makigtagbo sa tawo, ug kon diin Ako magasimba.” Gipili sa Dios ang maong dapit; dili sa denominasyon nga iglesia, kondili diha kang Jesus Cristo. Oo, sir.

⁷² Kinahanglan usab nga Siya “walay buling,” sumala sa gikaingon ko na. Walay denominasyon ang puedeng moangkon niana. Pag-angkonon nila; anticristo sila.

⁷³ Karon atong hingkaplagaan dinhi, matikdi ang Iyang landong pag-usab. Ang—ang nating carnero kinahanglan nga pagatipigan. Karon, makita kini diha sa Exodo 12, kung inyo kining ginatiman-an, Exodo 12:3 hangtud sa 6. Ang nating carnero kinahanglan pagatipigan sulod sa upat ka adlaw, aron susihon, aron makita kung kini ba takus sa pag-adto sa halaran. Gikuha kini, aron balik-balik nga masusi, sulod sa upat ka adlaw, aron tan-awon kung ma’y ikasaway ba diha niini, tan-awon kung ma’y sakit ba kini, tan-awon kung ma’y butang ba nga dili maayo sa maong nating carnero. Kinahanglan nga pagatipigan kini sulod sa upat ka adlaw.

⁷⁴ Karon matikdi. Tingali ang uban kaninyo naghunahuna nga mubo ra kaayo kana, pagapatyon dayon sa ika-napulo’g upat. Apan, nahinumdom ba kamo, ilang gikuha ang nating carnero sa ika-napulo ka adlaw sa bulan, ug gipatay kini sa ika-napulo’g upat ka adlaw sa bulan, kita n’yo, nga gitipigan sulod sa upat ka adlaw.

⁷⁵ Karon, si Jesus, ang Ngalan sa Dios, ang Cordero, miadto sa Jerusalem ug wala migawas pag-usab hangtud sa pagkatapos na sa Iyang kamatayon, paglubong, ug pagkabanhaw. Siya gitipigan ilalum sa mga mabiaybiayon sulod sa upat ka adlaw

ug upat ka gabii. Pagkahingpit kaayo nga tipo niadtong Cordero, nga gitipigan sulod sa upat ka adlaw. Mao kadtong higayon nga miingon si Pilato, “Walay akong hingkaplagan nga sayup diha Kaniya.”

⁷⁶ Usa pa ka landong bahin Kaniya, walay bukog ang madugmok diha Kaniya, nga eksaktong, dili gyud nila mahimo. Sa ilang pagpatay sa halad, dili nila puedeng balion ang bukog. Tungod pag-mabali nila, dili kini dawaton. Ug ila na untang martelyohon kaniadto aron dugmokon ang mga bukog sa mga bitiis ni Cristo, sa ilang pag-ingon nga, “Patay na Siya.” Ilang gidughang ang Iyang kilid ug nakakita’g Dugo ug tubig.

⁷⁷ Matikdi pag-usab ang usa pa dakung butang dinhi. Dili ko kini laktawan, tungod kay Siya ang girepresenta diha sa mga halad, ang halad nga kalan-on.

Akong nahinumduman usa ka higayon nga aduna sila’y tulonghaan kaniadto, nga mabasa sa Biblia, gitawag nga tulonghaan sa mga propeta, ug usa gyud kadto ka tulonghaan. Ug atong nasayran nga si Elias mitungas didto niadtong maong tulonghaan usa niana ka adlaw, ug miingon sila, “Kami...” Mihangyo sila kaniya nga mohawa, nag-ingon, “Kung ania man gud ka dinhi, ang mga butang labihan ra ka tul-id.” Busa gusto nila siyang pahawaon.

Ug migawas sila aron maandaman nila siya og panihapon. Ug usa ka panon sa mga pari ang migawas, o mga propeta, aron magkuha og mga ulotanon, aron mag-andam ug panihapon alang kaniya. Ug sa dihang miadto na sila, nakakuha sila og usa ka dakung puyos niini; ug sa ilang pagbalik, mga ihalas diay kadto nga tabayag, nga makahilo, ug ilang giitsa ngadto sa kolon. Ug ang kolon misugod na sa pagbukal, ug ilang, adunay, miingon, “Hala, adunay kamatayon diha sa kolon. Karon bisan kita dili na makakaon.”

Ug miingon si Elias, “Dad-i ako og usa ka kumkum nga harina.” Ug iyang gikuha ang harina ug giitsa kini ngadto sa kolon, ug miingon, “Kaon na mo. Ang kolon naayo na.”

⁷⁸ Si Cristo ang maong halad nga kalan-on. Ang matag lugas kinahanglan nga managsamang ipahimutang, ug ang matag gagmay’ng tipik sa harina kinahanglan nga parihas ang pagkagaling, alang sa halad nga kalan-on. Nagapakita nga Siya mao ang Mananambal. Iyang ginailisan, ug ginakuha ang kamatayon, ug ginapuli ang Kinabuhi; pinaagi’g duha ka mga balaod. Alleluyah! Nga diin man ang kamatayon, diha man sa usa ka dapit; pagmosulod si Cristo, nagasulod ang Kinabuhi. Siya mao sa gihapon kagahapon, karon, ug hangtud sa kahangturan. Ug diin anaay kamatayon, didto nagkaadunay Kinabuhi, tungod kay gipasulod man si Cristo, ang halad nga kalan-on.

⁷⁹ Unsa ka dakung leksyon ang mahimo niining mga butanga kung atong hatagan og panahon nga madetalye ang mga niini! Karon matikdi, wala ni usa ka pulong sa maong mga landong ang napakyas. Walay usa ka pulong ang napakyas sukad-sukad, sa maong landong. Ang tanantanan hingpit gyud nga natipo.

Siya mao ang dapit nga gipili sa Dios sa pagsimba, ug gihatag Kaniya ang Ngalan sa Dios. Siya mao ang dapit sa Dios sa pagsimba, ug ang Ngalan sa Dios gihatag ngadto Kaniya. Siya mao ang Pulong sa Dios, ug Siya mao ang Ngalan sa Dios. Siya mao ang Pulong sa Dios ug usab ang Ngalan sa Dios. “Siya mao ang Pulong nga nahimong unod.” Siya mao ang Pulong sa Dios, Cordero sa Dios, Ngalan sa Dios, ug ang Dios. Ingon niana Siya, ang gipili ug ang bugtong dapit sa pagsimba sa Dios.

⁸⁰ Ug ginasalikway sa Dios ang tanang ubang dapit gawas kang Jesus Cristo; dili mo Siya mahimong simbahan bisa’g asa. Siya miingon, “Kawang lamang ang ilang pagsimba Kanako, kay ilang gipaka Doktrina ang mga kasugoan nga iya sa tawo.” Karon aduna na’y atong mga kredo, mga dogma, ug tanan nang butang, nga nagatudlo nga *kini* mao ang dalan ug *kana* mao ang dalan.

Ug si Jesus miingon, “Ako mao ang Dalan, ang Kamatuoran, ug ang Kinabuhi, ug walay makaadto sa Dios gawas kon pinaagi Kanako.” Sa laing pagkasulti, “Ako mao ang Pultahan sa toril. Ang tanan nga anaa sa gawas nga tulisan.” Siya mao ra ang bugtong paagi sa pagduol. Siya mao ang Pultahan. Siya mao ang Dalan, ang Kamatuoran, ang Kinabuhi, tanan na; ang bugtong agianan, ang bugtong dapit, ang bugtong pagsimba, ang bugtong Ngalan.

Ang tanan nagpahinungod kang Jesus Cristo. Ang tibuok Daang Tugon nagpahinungod Kaniya. Ang Bag-ong Tugon nagpahinungod Kaniya. Ug ang Iglesia sa karon nagpahinungod ngadto Kaniya, pinaagi sa Pulong sa Iyang sugo. Wala na’y lain pang dapit, o lain pang Ngalan, o bisan asa, diin ang Dios nagsaad nga didto Niya tagboon ang tawo; diha lamang kang Jesus Cristo, ang Iyang dapit nga gipili sa pagsimba.

⁸¹ Matikdi, nagsaad ang Dios nga tagboon Niya ang Iyang mga magsisimba diha lamang sa usa ka dapit, ug kanang Iya Mismong gipili; dili sa atong pagpili, dili sa atong pagpanghunahuna; kondili sa Iyang panghunahuna, sa Iyang pagpili. Ug kini mao ang dapit diin Iyang gibutang ang Iyang Ngalan, dapit nga Iyang gipili. Busa atong nasayran nga atong hingkaplagan kon diin ang Iyang Ngalan, unsay Iyang gipili, pinaagi sa Iyang Kaugalingon pagpili.

⁸² Karon nga hingkaplagan na nato ang dapit nga gibutangan sa Iyang Ngalan, nga diha, kang Cristo Jesus, ug wala na’y laing dapit, o wala na’y laing ngalan, natagbaw ba kamo niana? Moingon og, “Amen.” [Nagaingon ang kongregasyon,

“Amen.”—Ed.] Karon, ang butang niini mao, kung atong hingkaplagan kung asa dapit...Dili madawat ang dapit pasimbahan nga bisan asa na lang, diha lang gyud kang Cristo.

Mahimo kang maghinulsol, mahimo mo kana, apan wala ka pa sa pagsimba. Nagapangayo ka pa lang og kapasayloan. Si Pedro miingon...

Niadtong Adlaw sa Pentecostes, sa dihang nakita nila silang tanan nga nanagsulti og laing mga pinulongan, ug nagakahitabo ang dagkung mga ilhanan ug mga katingalahan, misugod pagpangatawa ang mga tawo, ang iglesia miduyog usab, ug miingon, “Kining mga tawhana nangahubog sa bag-ong bino. Nagalihok sila sama sa hubog nga mga tawo. Ang...” Si Maria nga ulay, silang tanan, nagkatigum, usa ka gatus ug kaluhaan sila. Ug nagasarasay sila sama sa tawong hubog, ug nagasulti’g laing mga pinulongan, ug nagasige’g ingon niana. Ingon sa mga tawo, “Kining mga tawhana nangahubog sa bag-ong bino.”

⁸³ Apan si Pedro, mitindog, miingon, “Mga katawhan ug mga kaigsoonan, kining mga tawhana wala mahubog sa bagong bino, sanglit karon ikasiyam pa lamang ang takna sa kabuntagon. Apan kini mao ang giingon kaniadto sa propeta nga si Joel, ‘Ug mahitabo sa kaulahiing mga adlaw, nagaingon ang Dios, pagabuboan Ko sa Akong Espiritu ang tanang katawhan; ug magahimo’g profesiya ang inyong mga anak nga lalaki ug babaye; ug Akong mga alagad nga babaye ug sulogoong babaye pagabuboan Ko sa Akong Espiritu. Ipasundayag Ko ang mga katingalahan sa itaas diha sa kalangitan, ug diha sa yuta; kalayo, mga haligi nga kalayo, mga gabon nga aso. Kini mahitabo, sa dili pa moabot ang daku ug makalilisang nga Adlaw sa Ginoo, nga si bisan kinsa ang magatawag sa Ngalan sa Ginoo mamaluwas.’”

⁸⁴ Ug sa ilang pagkadungog niini, gisakitan sila sa kasingkasing, ug miingon, “Mga igsoon, unsa ma’y among pagabuhaton?”

⁸⁵ Si Pedro mitubag, “Maghinulsol, ang matag usa kaninyo, ug magpabautismo sa Ngalan ni Jesus Cristo alang sa kapasayloan sa inyong mga sala, ug inyong madawat ang gasa nga Espiritu Santo. Tungod kay ang saad alang sa tanang umalabot nga mga kaliwatan.” Karon atong hingkaplagan kana.

⁸⁶ Karon atong hibalong kung unsaon nato *pagduol* Kaniya. Unsaon man nato sa pagsulod niining dapit sa pagsimba? Unang Mga Taga-Corinto 12 mao’y tubag niini, kay, “Pinaagi sa usa ka Espiritu!” Dili pinaagi sa usa ka iglesia, dili pinaagi sa usa ka kredo, dili pinaagi sa usa ka pastor, dili pinaagi sa usa ka obispo, dili pinaagi sa usa ka pari. Kondili, “Pinaagi sa usa ka Espiritu Santo kitang tanan nabautismohan pasulod sa usa ka Lawas,” nga mao ang Lawas ni Jesus Cristo, ug napailalum sa matag gasa nga gikapahimutang diha sa Lawas. Oo, sir! Dili sa pagpasakop, dili sa pagsaulog sa mga kredo, dili sa pagpataas-

taas, pagpaubos-ubos, sa pagpakiglamano, o dili sa tanang uban pa. Kondili, pinaagi sa Pagkahimugso kita gibautismohan diha sa Lawas ni Jesus Cristo! Amen. “Pinaagi sa usa ka Espiritu Santo kitang tanan gibautismohan pasulod sa usa ka Lawas.”

⁸⁷ Ug unsa kanang Lawasa? “Sa sinugdanan mao ang Pulong, ug ang Pulong kauban sa Dios, ug ang Pulong mao ang Dios. Ug ang Pulong nahimong unod ug nagpuyo uban kanato.” Unsaon man nato pagkaapil nianang Lawasa ug atong isalikway ang usa ka Pulong Niini, o ibutang Kini sa kung asa man nga halayo nga wala na gani Kini nasulod sa maong Lawas? Unsaon man nato pagkahimo niana? Ang pinili ra gyud sa Dios nga dapit!

⁸⁸ Matikdi, ug kung tinuod nga nabautismohan ka diha Kaniya, ang tinuod nga ebidensiya mao nga ikaw nagatoo Kaniya, nagatoo sa Pulong.

Unsaon man nimo pagkahimong bahin Kaniya ug unya ilimod mo Siya? Unsaon man nako paglimod sa akong kamot ingon nga ako man kining kamot? Kung dihay. . . Kung ilimod ko, aduna gyu’y dili maayo sa akong pangisip. Ug unsaon man nako? Kung adunay dili maayo sa akong pangisip, nga ilimod nga kana akong kamot, nga ilimod nga kana akong tiil, nan adunay espirituhanong sayup sa magtotoo nga nagalimod sa bisan unsang Pulong nga gisulti sa Dios ug gisaad. Aduna gyu’y usa ka butang nga espirituhanong sayup nianang gitawag nga magtotoo kono.

⁸⁹ Dili mo mahimong ilimod bisan ang usa ka titik Kaniya, tungod kay ikaw nahimo na man nga kabahin Niya. Ikaw kabahin Niya tungod kay gibautismohan ka man diha Kaniya; pinaagi, sa Espiritu Santo ikaw gipasulod ngadto sa Lawas ni Jesus Cristo. Pagkamaanindot nga butang!

⁹⁰ Ang Dios adunay usa ka pihong dapit diin Niya gitagbo—diin Niya gitagbo si Abraham, ug didto si Abraham misimba. Hangtud sa tibuok Kasulatan!

Ug ang Iyang Pulong nga gisaad pagahubaron diha kaninyo, pinaagi Kaniya. Nasabtan ba ninyo kana? Ang Pulong nga Iyang gisaad nga tumanon diha sa panahon nga inyong gipuyan: mamahimo kang usa ka sinulat nga basahon sa Dios, nga ginabasa sa tanang tawo. Dili sa kung unsa ang imong ginaangkon, kondili sa kung unsay ginabuhat sa Dios pinaagi kanimo, mao kana’y mosulti og mas kusog kay sa bisan unsa nga mahimo mong ipahayag. Ang Dios nag-ingon, “Kining mga ilhanan maganunot kanila nga nagatoo.” Kana mao’y magasulti pinaagi kaninyo.

⁹¹ Siya naghigot na mahitungod niining kapanahonan, kung unsa ang mahitabo karong panahona. Ang mga magtotoo niining kapanahonan kinahanglan nga toohan Kini, kung unsay Iyang gisaad para sa karon. Sama ra kaniadto nga kinahanglan nilang mosulod sa arka, aron maluwas; mogawas sa Egipto aron

maluwas; kinahanglan usab nilang mosulod kang Cristo, aron maluwas sa karong panahon, pasulod sa Mensaheng Pulong, nga Siya mao sa gihapon kagahapon, karon, ug hangtud sa kahangturan.

⁹² Sa unsa mang paagi kamo makasulod Niini? Pinaagi'g bautismo! Bautismo sa unsa, sa tubig? Sa Espiritu Santo! “Sa Usa ka Espiritu, kitang tanan gibautismohan pasulod niining usa ka Lawas.”

⁹³ Ug ang Iyang gisaad nga Pulong, dili Niya...Dili na kinahanglan nga hubaron mo pa Kini. Siya mao'y mohubad Niini pinaagi kanimo; kung unsay imong ginabuhad, kung unsay Iyang gisaad nga pagabuhaton. Ang Iglesia nga nagasunod Kaniya mahisama gayud Kaniya hangtud nga mahibaloan mismo sa mga tawo.

Tan-awa si Pedro ug si Juan sa dihang gipangutana sila mahitungod sa pagkaayo sa usa ka lalaki didto sa pultahan nga gitawag og Matahum. Ingon nila, “Ilang nasabot,” sa kadtong mga pari, “nga sila mga walay himbangaagan ug mga tawong walay edukasyon,” apan ilang namatikdan nga sila nakauban ni Jesus. Tungod kay, (unsa?) ginabuhad nila ang mga butang nga Iyang gibuhad.

⁹⁴ Siya kinahanglan nga magabuhad sa buluhaton sa Amahan. Ug kinahanglan nga mao ra sa gihapon sa karon.

⁹⁵ Karon, hinumdumi, Siya mao sa gihapon kagahapon, karon, ug hangtud sa kahangturan; tungod kay ang Dios makigtagbo kanimo diha Kaniya, ang bugtong nga maong dapit; tungod kay kana ang mao dapit nga Iyang gipili aron butangan sa Iyang Ngalan, diha kang Jesus. “Jesus” ang Ngalan sa Dios. Hinumdumi, ang Amahan, Anak, Espiritu Santo, mao'y mga titulo sa Ngalan nga “Jesus Cristo.”

⁹⁶ Sa pag-ingon ni Mateo, “Busa panglakaw kamo, ug tudloi ang tanang kanasuran, bautismohan sila diha sa Ngalan sa Amahan, sa Anak, ug sa Espiritu Santo.”

Grabe na ang pagkatuis niini sa karon, ug moingon, “Sa ngalan sa Amahan, sa ngalan sa Anak, sa ngalan sa Espiritu Santo.” Wala ma'y nahisulat nga ingon niana. Kini, “Diha sa Ngalan,” usa ra, “sa Amahan, Anak, Espiritu Santo.” Ang *Amahan* dili ngalan, ang *Anak* dili ngalan, ang *Espiritu Santo* dili ngalan; titulo kini.

Paglabay sa napulo ka adlaw, si Pedro mitindog ug miingon, “Paghinulsol, ang matag usa kaninyo, ug pabautismo sa Ngalan ni Jesus Cristo.” Unya gibuhad ba ni Pedro ang giingon ni Jesus nga dili niya angay'ng buhaton? Iyang gibuhad kung unsa lang ang Iyang giingon kaniya nga buhaton. Ang Ngalan sa Amahan, Anak, ug Espiritu Santo mao “Ang Ginoong Jesus Cristo.” Ang matag tawo diha sa Bag-ong Tugon gibautismohan sa Ngalan ni Ginoong Jesus Cristo.

⁹⁷ Wala ni usa ka tawo diha sa Biblia nga gibautismohan sukad diha sa mga titulo nga Amahan, Anak, Espiritu Santo. Wala gyu'y ingon niana sukad kaniadto hangtud nga ang kredong Nicaea gipatuman didto sa Nicaea, sa Roma. Usa kadto ka mando sa simbahang Katoliko, hingkaplagan, nga gikumpirma ang mao mismong butang, diha sa ilang katekismo. Aduna ko'y kopya niini, husto kana, *Facts Of Our Faith*, ug uban pa, nga kini usa gayud ka kredo sa Simbahang Katoliko. Sultihan ka nila nga wala kini sa Biblia; apan moingon sila nga aduna kono sila'y gahum sa pag-usab sa mga Pulong, kung mao'y ilang gusto, tungod sa papa. Supak ako.

Si Jesus Cristo mao sa gihapon kagahapon, karon, ug hangtud sa kahangturan. "Ug si bisan kinsa man ang magataktak og usa ka Pulong gikan niining Biblia," ingon ni Jesus, "o magadugang og usa ka pulong dinhi Niini, ang iyang bahin pagatangtangan gikan sa Libro sa Kinabuhi." Usa ra ka Pulong; dili og usa ka han-ay sa mga pulong, o usa ka parapo, kondili usa ra ka Pulong! "Ang si bisan kinsa nga magataktak og usa ka Pulong. . ."

⁹⁸ Sa sinugdanan, gilig-on sa Dios kaniadto ang Iyang katawhan pinaagi sa Iyang Pulong. Usa ra ka Pulong, nga gisayup sa pagsabot, nahimong hinungdan sa matag kamatayon, matag kasubo, matag kagul-anan. Si Eva, wala niya supaka ang usa ka han-ay sa pulong; usa lang ka Pulong ang gisupak niya. Sa pag-abot ni Jesus diha sa tunga-tunga sa Basahon. . . Ang sa una'y sa sinugdanan kadto sa Libro.

Pag-abot ni Jesus sa tunga-tunga sa Basahon, unsay Iyang giingon? "Nahisulat na nga ang tawo dili mabuhi sa tinapay lamang, kondili sa matag Pulong nga nagagula gikan sa baba sa Dios."

Diha sa katapusan sa Libro, Pinadayag sa ika-22 nga kapitulo, sa ika-18 nga bersekulo, sa katapusang bahin sa Biblia, si Jesus Mismo ang nagasulti, nag-ingon, "Ako nagapamatuod nga kung aduna ma'y magataktak og usa ka Pulong gikan niining maong Libro, o magadugang og usa ka pulong Niini, ang iyang bahin pagtaktakon gikan sa Basahon sa Kinabuhi," tungod kay siya usa ka mini nga propeta ug mao'y nagpasayup sa panabot sa mga tawo, ug ang ilang dugo pagapaninglon diha sa iyang kamot, tungod sa pagbuhat niana.

⁹⁹ Kinahanglan nga atong ampingan kanang usa ka dapit sa pagsimba, nga mao, si Jesus Cristo ang Pulong, nga mao sa gihapon kagahapon, karon, ug hangtud sa kahangturan. Amen. Padayonon ta. Hinumdumi, walay laing dapit nga tagboanan sa pagsimba, dili usa ka dapit. Dios ang nagpili Niini.

¹⁰⁰ Si Juan, didto sa tagboanan kaniadto tali sa Bag-o ug Daang Tugon. Paminaw mo og ayo karon. Matikdi pag-ayo. Si Juan, kadtong halangdong agila, miabot nga nagalupad gikan

sa kamingawan usa niana ka adlaw, nga nakabukhad ang iyang kusgan nga mga pako. Siya milugsong didto sa pangpang sa Jordan, usa ka bantugang agilang propeta nga mao'y nagtulay tali sa Daan ug Bag-ong Tugon, ug iyang gitawag sila gikan sa tuo ug wala. Siya nanawagan og paghinulsul usa niadto ka adlaw.

Diin nanuol ang mga Fariseo ug mga Saduceo; siya miingon, "Ayaw kamo pagsugod sa pag-ingon sa inyong kaugalingon, 'Anaa si Abraham nga among amahan,' tungod kay sultihan ko kamo nga ang Dios makahimo sa pagpatindog niining mga bato nga mahimong mga anak ni Abraham." Oh, grabe!

Sa dihang gisugdan niya pag-itsa ang iyang Maayong Balita, ug nagaingon, "Adunay Usa nga nagabarug sa taliwala ninyo, Nga wala kamo makaila. Wala pa nako Siya mailhi, apan mailhan ko Siya kung moabot na Siya. Dili gani ako takus sa pagtanggap sa Iyang sandalyas. Apan Siya mao'y magabautismo kaninyo sa Espiritu Santo ug Kalayo. Ug ang Iyang paliran anaa na sa Iyang mga kamot; Iyang pagahinloan pag-ayo ang Iyang giokan, ug Iyang pagasunogon ang mga uhot pinaagi sa Kalayo nga dili arang mapalong."

¹⁰¹ Kadtong bantugang agila sa Maayong Balita nga atua didto, nga ginatugaok ang iyang bug-at nga mga pagbahad. Ug migawas ang mahugaw'ng, si Herodes, ang emperador niadtong panahona, ang proklamador, nga giasawa ang asawa sa iyang igsoon. Ug mahunahuna ba ninyo kadtong bantugang agila sa Maayong Balita nga atua didto ug wala mipugong-pugong sa pagsulti niana?

Ang pila kanila miingon, "Ayaw gyud pagwali mahitungod sa kaminyoon ug panagbulag ha, Juan, kay anaa baya didto si Herodes nagalingkod."

¹⁰² Milakaw siya paingon mismo sa iyang atubangan ug miingon, "Dili uyon sa balaod alang kanimo nga mangasawa kaniya." Husto!

Unsa, siya, kaniadto? Siya mao kadtong agila nga nagagikan sa kamingawan. Wala siya mabansay ilalum sa tawhonong kalisang ug mga panghulga, sa kung unsa nga denominasyon. Kondili nabansay siya ubos sa Gahum sa Dios nga labing makagagahum, aron mahibalo kung unsay magakahitabo didto. Nahibalo siya sa ilhanan sa Mesias.

Alleлуйah! Kini nga pulong nagkahulogon og, "Dayega ang atong Dios!" Ayaw'g kahadlok. Wala pa ko'y napasakitan nga tawo. Wala ko nahadlok. Nahibalo ko mismo kung asa ako.

Oh, kung pamalandungon ko siya, kadtong bantugang agila nga milupad paingon didto ug mitugdon didto! Ingon niya, "Mailhan ko Siya pagmoabot na Siya."

¹⁰³ Usa niadto ka adlaw nagtindog siya didto, nga nagawali. Atua usab didto sa pikas ang mga pari, miingon, “Ang buot mo bang ipasabot nga moabot ang panahon nga ang adlaw-adlaw nga paghalad pagatangtargon na; kining dakung templo nga among binuhat, ug ang tanang mga buhat nga among gibuhat, kami nga dakung denominasyon?”

Siya miingon, “Moabot ang panahon nga kanang tanan pagawalaon na.”

“Dili kana mahitabo. Usa ikaw ka mini nga propeta!”

¹⁰⁴ Ug mitan-aw siya sa palibot. Siya miingon, “Tan-awa n’yo, anaa ra Siya! Mao kana Siya ang gipili sa Dios nga dapit sa pagsimba. Mao kana ang Cordero, ang tinuod nga Cordero nga magakuha sa sala sa kalibutan.” Wala siya miingon, “Ania na ang Methodist, ania na ang Baptist, o ang Katoliko.” Siya miingon, “Ania miabot na ang Cordero sa Dios nga magakuha sa sala sa kalibutan.”

Ang bugtong dapit nga adunay kaluwasan mao’y anaa nianang Cordero sa Dios. Diha lamang Kaniya ang kaluwasan; dili sa bisan unsang iglesia, bisan unsang kredo, bisan unsang katawhan, bisan unsang amahan, inahan, bisan unsang balaang tawo, o unsa pa man, balaan man nga dapit. Anaa kini sa Balaang Dios, kang Ginoong Jesus Cristo, diin gibutang sa Dios ang Iyang Ngalan diha sa Tawo, para sa katubsanan, Kinsa mao’y nagbayad sa bili alang kanatong mga makakasasala. Mao lamang kana ang bugtong dapit nga anaay kaluwasan. Mao kana ang Bato nga akong ginatindogan.

¹⁰⁵ Naila Siya ni Juan. Miingon siya, “Wala ko Siya hiilhi sa dihang nakita ko Siya nga nagalakaw paduol, apan didto kon diin ko nakuha ang akong natun-an...” Dili sa seminaryo sama sa gieskuwelahan sa iyang amahan; dili sama sa usa ka sacerdoteng, binansay. Kondili didto sa kamingawan, diin didto siya sa Teolohikanhong seminaryo nga iya sa Dios nga Labing Makagagahum, nga nagapaabot sa Pulong sa Dios; dili kung sa unsay gihimohimo sa kung unsa nga pundok sa mga tawo, kondili sa kung unsay giingon sa Dios mahitungod Niini. Ug sa paghangad ni Juan sa itaas ug nakita niya ang Espiritu nga nagakunsad, siya miingon, “Ako nagapamatuod, nga mao gyud kini Siya.” Oh, grabe!

Mao kana ang inyong dapit sa pagsimba. Mao kana ang inyong dapit nga tagoanan. Mao kana ang Cordero sa Dios nga magakuha sa sala sa kalibutan. Dili og unsa man nga iglesia, dili kredo, o unsang uban pa, kondili ang Cordero ra sa Dios nga nagakuha sa sala sa kalibutan.

¹⁰⁶ Nakita n’yo kung giunsa ni Juan sa pagpahimutang niini? Wala siya miingon, “Husto kamong mga Fariseo, kamong mga Saduceo, kamong mga maka-Herodes.” Siya miingon, “Kana

mao ang Cordero.” Mao kana ang dapit. Anaa Kaniya ang Ngalan. Siya Kana. Wala na’y laing Ngalan sa silong sa Langit!

¹⁰⁷ Bantayi kung unsay giingon ni Jesus mahitungod kang Juan niadtong panahona. Usa niana ka adlaw si Juan nagpadala og tawo ngadto Kaniya, aron sa pagtan-aw kung unsa gyu’y Iyang ginabuhat. Si Jesus miingon bahin kang Juan, “Siya mao kadtong daku ug nagadan-ag nga kahayag,” aron nga ipakita kanila ang hustong dalan nga ilang pagasundon sa dili pa ang pag-abot ni Jesus, ang Iyang unang pag-anhi. Paminaw mo og ayo. Ayaw’g pakyasa kini. Si Jesus miingon, “Si Juan mao kadtong kahayag.” Si Malaquias 3, sa wala gyu’y sayup! Ang maong propeta uban sa dakung kahayag nga nagadan-ag mao’y nagpaila kang Jesus nga mao’y bugtong Usa, “ang Cordero.” Ang tanang uban pang mga carnero nga gihisgotan sa mga sacerdote kaniadto, ug ang tanan niadtong laing butang, mga binuang ra. Ania ang “ang Cordero!” Ingon sa tawong giubanan sa dakung madan-ag nga kahayag, nga mao’y giingon ni Jesus nga mao si Juan.

Ang Malaquias 3 nag-ingon, “Akong ipadala ang Akong mensahero sa atubangan Ko aron sa pag-andam sa dalan.” Ug ang gipadala aron sa pag-andam sa dalan, miila Kaniya nga mao ang dapit. “Mao kana Siya! Walay sayup. Mao kana Siya! Akong makita ang ilhanan nga nagasunod Kaniya. Nahibalo ako nga mao kana Siya; usa ka Kahayag nga nagakunsad gikan sa Langit ug mitungtong sa ibabaw Niya.” Sigurado gayud, nga Siya kadto.

¹⁰⁸ Unya, igsoon ko, gusto kong mangutana kaninyo’g usa ka butang, sa pagtapos. Tingali’g moingon kita niini. Diha sa Malaquias 4, dili ba gisaaran usab kita og usa pa ka agila, usa ka Haligi nga Kahayag nga magasunod, aron ipakita sa masalaypon nga iglesia niining adlaw nga Siya mao ang Mga Hebreohanon 13:8, “mao sa gihapon kagahapon, karon, ug hangtud sa kahangturan”? Dili ba nga gisaaran kita og usa na usab nga magaabot gikan sa kamingawan? Amen! Kana ang eksaktong Kamatuoran. Unsa ka sibo gayud ug takdo kini diha sa Lucas 17:30, diin ang Anak sa tawo (ang Agila) magapadayag sa Iyang Kaugalingon aron himoong kawang ang tanang uban pang mga dapit nga pagsimba, sama sa mga denominasyon ug uban pa!

Ang Dios ang nagpili sa Iyang dapit. Si Juan miingon, “Anaa na Kini!”

¹⁰⁹ Ug unya gisaaran ta og samang butang para sa karong panahon, diha sa Malaquias 4, “Aron sa pagpabalik sa kasingkasing sa mga anak,” aron sa pag-ingon nga Siya dili patay, nga kining mga butanga dili alang sa lain nga kapanahonan; nga ang bautismo sa Ngalan ni Jesus dili alang sa panahon kaniadto, kondili Siya mao sa gihapon karon. Amen.

Aron nga mahimong kawang ang tanang mga dapit sa pagsimba, mao kana ang pagabuhaton sa agila sa katapusang-panahon, aron ipakita nga ang tanang uban pa niini binuang ra, nga binuang ang denominasyon, ug itudlo sila pag-usab uban sa mao ra nga ilhanan nga Iyang gibuhat kaniadto, nga Siya mao sa gihapon kagahapon, karon, ug hangtud sa kahangturan. Alleluyah!

¹¹⁰ Ug usab, diha sa Pinadayag 4:7, adunay atong upat ka mga Mananap nga bag-o lang nato nahisgotan.

Ang nahauna mao, nga atong hingkaplagan...atong hingkaplagan, nga mao ang leon. Mao kadto ang unang Mananap nga migula aron atubangon ang hagit niadtong panahona, ang Leon sa Banay ni Juda.

Human Kaniya miabot ang sunod nga Mananap. Ug atong hingkaplagan, nga ang sunod nga Mananap mao ang baka, nga mao ang mananap alang sa lulan, usa ka halad. Sa mga adlaw sa mga Romanhong simbahan, ang Iglesia namatay; gihalad.

Ang sunod nga miabot, mao ang tawo, usa ka Mananap nga adunay dagway sa tawo. Ug ang maong tawo mao kadtong mga reformador, edukasyon sa tawo, teolohiya, ug uban pa.

Apan ang katapusang Mananap mao kanang nagalupad, ang katapusang Mananap nga taliabot, ang ingon sa Biblia nga kini mao ang nagalupad nga agila. Alleluyah! Ug ang propeta nag-ingon nga, niining panahona, “Motungha ang Kahayag.” Oh, grabe! “Niadtong adlaw maanaay Kahayag.”

¹¹¹ Nagkaaduna na og adlaw sa mga reformador. Nagkaaduna na og adlaw nga makilumkilum, dili matawag nga adlaw o gabii man. Apan sa panahon sa kagabhion, sa panahon sa Agila:

Maanaay Kahayag sa panahon sa Agila,
 Ang agianan paingon sa Himaya imo gayu’y
 makaplagan;
 Sa agianan sa tubig mao ang Kahayag karon,
 Nga gilubong sa bililhong Ngalan ni Jesus.
 Mga batan-on ug mga tiguwang, maghinulsol
 kamo sa tanan ninyong mga sala,
 Ang Espiritu Santo mao’y mobautismo
 kaninyo pasulod;
 Tungod kay ang mga Kahayag sa kagabhion
 miabot na,
 Kini mao ang tinuod nga ang Dios ug si Cristo
 Usa ra.

¹¹² Amen! Motungha ang Kahayag sa panahon sa kagabhion, ang bugtong pinili sa Dios nga dapit sa pagsimba. Oh, unsa ba ang tuyo nga miabot kini nga Mensahe, unsa ma’y Iyang buhaton? Ug diha sa Iyang adlaw motungha ang Kahayag sa panahon sa kagabhion, ug (unsa?) aron sa pag-abi-abi sa Iyang mga anak pabalik sa matuod nga Yutang saad, pinaagi sa mao ra

nga ilhanan nga Haligi nga Kalayo nga mao'y nag-una kaniadto sa mga anak sa Israel latas sa kamingawan.

Ang gipili sa Dios nga dapit sa pagsimba, si Jesus Cristo. Mao ra kana ang bugtong dapit. Mao kana ang bugtong Ngalan nga gihatag sa Dios alang sa kaluwasan. Mao kana ang Iyang gihingalan sa banay didto sa Langit, sa dihang ania na sa yuta, mao'y Jesus Cristo.

¹¹³ Oh iglesia, Oh katawhan, higalang makasasala, ayaw pagsalig ngadto sa lain gawas kang Jesus Cristo. Ayaw pagsalig diha kang bisan kinsa nga magwawali. Ayaw pagsalig kang bisan kinsa nga mao'y moluwas kanimo. Ayaw pagsalig sa bisan unsang iglesia, bisan unsang kredo, bisan unsang denominasyon. Salig lamang kang Jesus Cristo, kay Siya mao ang Kahayag sa takna.

Atong iduko ang atong mga ulo.

Motungha ang Kahayag sa panahon sa kagabhion,
 Ang agianan paingon sa Himaya imo gayu'y makaplagan;
 Sa agianan sa tubig mao ang Kahayag karon,
 Nga gilubong sa bililhong Ngalan ni Jesus.
 Mga batan-on ug mga tiguwang, maghinulsol kamo sa tanan ninyong mga sala,
 Ang Espiritu Santo mao gayu'y mobautismo kanimo pasulod;
 Ang Kahayag sa kagabhion miabot na,
 Kini mao ang tinuod nga ang Dios ug si Cristo
 Usa ra.

¹¹⁴ Oh, igsoon nga lalaki, ug babaye, kung wala ka pa makahinulsol, kung wala ka pa mabautismohi sa Ngalan ni Jesus Cristo, makahimo ka ba sa pagsugod niining gabhiona? Mahatagan mo kaha ang Dios og kahigayonan sa pag-abi-abi kanimo diha sa dapit diin makasimba ka Kaniya? Hinumdumi, gawas niana, wala na'y dapit nga gisaad ang Dios sa pagpakigtagbo kanimo ug dawaton ang imong pagsimba.

¹¹⁵ Moingon ka, "Igsoong Branham, nagasimba man ako nga matinud-anon!" Mao usab si Cain kaniadto. Iyang gibuhit ang tanan na nga matang sa halad nga gihalad kaniadto ni Abel, apan sayup kadto nga halad. Tingali'g nagasimba ka, ug nagahatag sa imong ikanapulo, ug ginabuhit ang imong obligasyon ingon nga sa usa ka Cristohanon, ingon ka sinsero sama sa kang bisan kinsang lalaki o babaye.

Nagbarog ako dinhi sulod sa mga katloan na ka mga tuig, sa tibuok nga siyudad dinhi, ug ginasinggit ang mao ra gihapon nga Mensahe. Nagakatiguwang na ako. Dili na ako magdugay nga kauban ninyo. Apan hinumdumi, sa Adlaw sa Paghukom, ang akong tingog narekord na, ug magasulti kini batok kaninyo.

116 Adunay usa lamang ka dapit nga gibutangan sa Dios sa Iyang Ngalan, ug kana wala sa usa ka iglesia, kondili diha kang Jesus. Adunay usa lamang ka dapit alang sa pagsimba, usa lamang ka dapit nga pagadawaton ka, ug kana anaa diha sa Hinigugma, nga si Jesus Cristo. “Wala na’y laing ngalan sa silong sa Langit, nga gikahatag, nga pinaagi niini maluwas ang tawo,” walay iglesia, walay kredo, walay bisan unsa. Si Jesus Cristo ra!

Ug kana mao ang angay nga Mensahe sa karong panahon, “Aron pabalikon ang kasingkasing sa mga anak, balik ngadto sa Pagtoo nga sa makausa pa gikatugyan ngadto sa mga balaan.” Dawaton ba ninyo Kini niining gabhiona?

Ug samtang atong giduko ang atong mga ulo.

117 Ug kadtong buot magpahinumdam sa pag-ampo, mahimo ba nga inyong iisa ang inyong mga kamot. Dili ta makahimo sa pagpaduol sa altar, tungod sa daghan ra kaayo. Ang Dios magapanalangin kaninyo. Oh grabe! Dinhi sa akong wala, sa akong banabana adunay mga tulo ka gatus.

118 Karon dinhi sa akong tuo, mahimo ba nga inyong iisa ang inyong mga kamot, ug moingon, “Buot ko nga mahinumduman.” Siguro adunay usa ka gatus ug kalim-an, o kapin pa, dinhi sa akong tuo.

Anaay atong tabernakulo diha sa ubos nga adunay dakung linaw sa tubig; ang pastor, usa ka maayong pastor, si Igsoong Orman Neville, mga kaabag, kining mga lalaki nga ania dinhi nga inyong nakita ug nahimamat. Sa matag adlaw, matag gabii, matag takna, sa mga tawo nga buot magpabautismo, kadtong mga naghinulsol, kanunay kining nagapaabot. Ug kung inyong tumanon kana nga sugo, makasiguro ka, tungod sa saad sa Dios, kung matinud-anon ka sa imong kasingkasing, sa pagdawat sa bautismo sa Espiritu Santo.

119 Adunay usa lamang ka dapit sa pagsimba. Karon, wala kana sa tabernakulo. Anaa kana kang Cristo. Unsaon man nato sa pagsulod Kaniya? “Pinaagi sa usa ka Espiritu kitang tanan gipangbautismohan pasulod sa usa ka Lawas.”

Mag-ampo ta.

120 Minahal nga Dios, maingon nga gipataas kini nga mga kamot, ilang gipaila kung unsay anaa sa ubos nianang kamot diha sa kasingkasing, usa ka hugot nga pagtoo nga siguradong nagkinahanglan sila og tabang gikan Kanimu. Nagaampo ako alang sa matag usa kanila, Amahan. Ug akong kutlo-on ang Imong Pulong. Miingon Ka, “Siya nga nagapatalinghug sa Akong Pulong, ug nagatoo Kaniya nga nagpadala Kanako, ma’y Kinabuhing dayon, ug dili na paga-Hukman; kondili nakalabang na gikan sa kamatayan ngadto sa Kinabuhi.”

Amahan, ingon nga bag-ohay pa lang ako migikan niining siyudad sulod sa pipila ka semana, mibalik, nangutana, “Kumusta man *kining* igsoon?”

“Aba, wala na siya.”

“Bueno, kumusta man *kining* si . . .”

“Wala na sila.”

¹²¹ Minahal nga Dios, tagsatagsa kanamo ginatawag na, kinahanglan atubangon sa matag usa kanamo ang hagit ug tabukon ang walog sa landong sa kamatayon. Ug ang matag usa kanamo kinahanglan gayud, ingon nga mga mortal. Apan, niining gabhiona, Imong gihatag kanamo ang Imong tanyag, nga kon motoo lamang kami Kaniya ug magpabautismo sa Iyang Ngalan, nga kami Imong pasudlon. Ug unya diha niining maong Lawas, ang Lawas ni Cristo, dili nga diha sa iglesia, kondili diha sa Lawas ni Cristo, kana nga Lawas gikahukman na. Dili na Kini moatubang pa sa Paghukom. Gibubo na sa Dios ang Iyang kapungot diha nianang lawas, ug kana nga lawas nakagawas na sa sala; ug, maingon nga kami anaa na Kaniya, gipahigawas na kami sa sala, pinaagi sa Iyang Paglukat nga namatay alang kanamo. Ug dinha kami adunay pagpakig-fellowship sa usa’g usa, samtang ang Dugo ni Jesus Cristo, ang Anak sa Dios, ginapapabilin kami nga hinlo gikan sa tanang sala ug kahugawan.

¹²² Amahan, nga Dios, nagaampo ako nga Imong dawaton ang matag usa kanila ngadto sa Imong Ginghamarian. Itugot kini, Dios. Hinaut nga walay usa kanila ang mawala; hinaut nga walay usa ka batang lalaki o babaye, hamtong nga lalaki o babaye. Ginoo, ang pipila sa akong mga paryenti ania nagalingkod, karong gabhiona, sila nga mga wala pa napailalum nianang Dugo. Klaro kaayong mahinumduman ko pa ang mga pulong sa akong amahan! Ug nagaampo ako, Mahal nga Dios, nga wala ni usa kanila ang mawala. Itugot kini, Ginoo. Ako nagatoo Kanimo karon, kutob sa tanan nga akong mahimo sa pagtoo.

¹²³ Mamuhat Ka sa akong mga kaigsoonang lalaki, kaigsoonang mga babaye, sa akong mga kahigalaan, dinhi niining dapita ning gabhiona ug bisan didto sa halayong dapit pinaagi’g telepono. Kapid-an sa nagkalainlaing mga estado ang nagapaminaw karon, ang tanan gikan sa Sidlakan nga Kabaybayonan hangtud sa Kasadpan. Ako nagaampo, Mahal nga Dios, nga sa pikas disyerto didto sa Tucson, padulong sa California, ngadto sa Nevada ug Idaho, hangtud sa Sidlakan ug sa palibot didto, paingon sa Texas; samtang ginatanyag kini nga inbitasyon, sa mga tawong atua sa—sa gagmay’ng mga kasimbahanan, sa mga gasolinahan, mga balay puloy-anan, nga nagapaminaw. Oh Dios, hinaut nga kanang nahisalaag nga lalaki o babaye, batang lalaki o babaye, niining taknaa, moduol Kanimo. Itugot kini karon mismo. Amo *kining* ginapangayo sa Ngalan ni Jesus, nga ilang

makaplagan kining dapit nga ma'y kasigurohan samtang ma'y panahon pa.

Sa diha, nga amo nang makita ang kamot nga nagasulat diha sa bongbong, ang kalibutan nga nagsugod na og kalisang, nagakahaduol na ang kagawasan. Kabahin sa among nasud nagakaunlod na, ang laing bahin usab nangatumpag na ug nangasiak tungod sa mga linog, maingon sa gisaad ni Jesus nga magakahitabo. Ayaw'g itugot nga maglangan pa sila, Ginoo. Hinaut nga ila nang dawaton kini karon, tungod kay amo silang gitanyag Kanimo ingon nga mga tropeo sa niining panagtigum, sa Maayong Balita, sa Ngalan ni Jesus.' Amen.

¹²⁴ Nagatoo ba kamo Kaniya? Ang Dios magapanalangin kaninyo. Pila kaninyo ang nagatoo nga ang Kamatuoran kana, diha sa akong wala? Iisa ang inyong kamot. Pila man diha sa akong tuo? Ipataas ang inyong kamot. Ang Dios magapanalangin kaninyo. Kutob sa akong makita, tanan sila. Kana ang Kamatuoran, mga higala. Ang Dios nasayod nga tinuod kana.

¹²⁵ Karon samtang anaa kamo Kaniya, ug diha Kaniya, puede n'yong maangkon ang tanang butang nga tungod niini Siya namatay. Ug para unsa man ang Iyang pagkamatay? "Siya gisamaran tungod sa atong mga kalapasan, napangos tungod sa atong kasal-anan; ang silot sa atong pakigdait diha sa ibabaw Niya, ug pinaagi sa Iyang mga labod kita nangaayo." Nagatoo ba kamo niana? Nagatoo ba kamo sa Iyang pagbayad-sa-sala alang sa atong pagkaayo karon?

¹²⁶ Anaa ba'y nagmasakiton kanato? Tugoti silang ipataas ang ilang mga kamot, diha sa tuo o sa wala. Dakung panon sa mga masakiton. Dili na ako puedeng magpalinya. Nakita n'yo, wala ko'y . . . dili na puede magpasaka dinhi sa entablado. Wala na'y paagi nga mapahigayon kini.

Adunay ilang tigum sa pag-ampo didto sa ubang mga dapit, alang sa mga masakiton, diha sa mga kasimbahanan ug mga ingon niana, didto sa tabernakulo.

Mangutana ako kaninyo'g usa ka butang. Pila man ang mga magtotoo dinha? Iisa ang inyong kamot. Sige. Akong kutloon alang kaninyo ang Pulong, nga mao si Cristo. Ang katapusang sugo ni Jesus sa kalibutan, ug ngadto sa Iglesia, diay, kini ang Iyang giingon, "Kining mga ilhanan maganunot kanila nga nagatoo; kung ipandong nila ang ilang mga kamot sa mga ma'y sakit, mamaayo sila." Pila ang nasayod nga tinuod kana, Marcos 16, nagaingon, "Amen." [Ang kongregasyon nagaingon, "Amen."—Ed.] Sige. Ginahangyo ko kamo ingon nga magtotoo sa pagpandong og kamot diha kang bisan kinsa nga anaa sa inyong atubangan. Ipandong lang ang inyong mga kamot sa kang bisan kinsa nga anaa sa inyong atubangan, ug ang matag usa mag-ampo og usa ka pag-ampo alang sa matag usa karon. Ipandong

ang inyong mga kamot ibabaw kang bisan kinsa nga anaa sa inyong duol.

¹²⁷ Ginoo, ania sa akong atubangan kining usa ka kahon sa mga panyo, gamay'ng mga panapton; gikan sa usa ka tigulang nga inahan nga nagahigda na lang sa kung asa, naghimalatyon na, usa ka bata nga naghimalatyon usab, mga tawong masakiton sa tanang dapit. Among nabasa diha sa Biblia nga ilang gidad-an ang mga masakiton og mga panyo ug mga tapis nga nahidapat sa lawas ni Pablo, ug gidapat nila kini nila sa mga masakiton; ug ang dautan nga mga espiritu, ug ang mahugaw'ng espiritu, ug ang mga balatian, ug mga sakit, namahawa gikan sa mga tawo. Karon, Ginoo, nasayod kami nga dili kami si San Pablo, apan nahibalo kami nga Ikaw nagpabilin sa gihapon nga si Jesus, ang bugtong gitagana sa Dios nga dapit sa pagsimba. Ug karong, adlaw, kining mga tawo nagapahayag sa ilang managsamang pagtoo, nga nagatoo sama niadtong nanagtoo nga mga tawo. Siguradong Ikaw ang naghimo og paagi alang kanila! Ug akong gipandong ang akong mga kamot sa ibabaw niining mga panyo ug ginahangyo nga ang mga balatian ug mga pagsakit mobiya na sa mga lawas sa maong mga tawo samtang igapatong kini diha sa Ngalan ni Jesus Cristo.

¹²⁸ Karon, gikatudloan kami, sa diha nga migawas ang Israel gikan sa Egipto, diha sa pagsunod sa ilang katungdanan, padulong na sila ngadto sa yutang saad. Ang Ang Dagat nga Mapula mibabag diha sa ilang alagianan. Ug ang Dios mitan-aw sa ubos pinaagi sa Haligi nga Kalayo, ug nalisang ang dagat, milukot kini pagbalik, ug gipaagi ang Israel paingon ngadto sa yutang saad. Oh Dios, tan-aw Ka sa ubos pinaagi sa Dugo ni Jesus, niining gabhiona, ug hinaut nga ang mga balatian malukot pagbalik, ug si Satanas mapalayas. Ug hinaut nga molabang ang mga tawo paingon nianang saad sa maayong panglawas ug kapiskay, nga giingon sa Dios, "Labaw sa tanang mga butang, ako nanghinaut nga kamo magma-uswagong diha sa maayong panglawas."

¹²⁹ Karon maingon nga nakita Mo dinha, Ginoong Jesus, nga ang mga kamot niining mga tawo nakapandong ibabaw sa usa'g usa, ilang ginasimbolo ang ilang pagtoo, nga nag-ingon Ka, "Kining mga ilhanan maganunot kanila nga nagatoo." Sila nagaampo sa ilang kaugalingong pamaagi, alang sa usa'g usa. Ang sunod nga tawo nagaampo usab alang kanila.

¹³⁰ Karon, Ginoo, kining maong hagit giatubang na, nga si Satanas, ang daku niyang panghulga-hulga, wala siya'y katungod sa pagkontrolar sa anak sa Dios. Siya'y usa ka binuhat nga napildi na. Si Jesus Cristo, ang bugtong dapit sa pagsimba, ang bugtong matuod nga Ngalan, gibuntog na siya didto sa Kalbaryo. Ug among giangkong ang Iyang Dugo karon mismo, nga gipildi na Niya ang matag balatian, matag sakit.

Ug akong ginamandoan si Satanas nga mohawa niining mga tumatambong. Sa Ngalan ni Jesus Cristo, gumula ka niining mga tawo, ug sila mamahimong gawasnon na.

¹³¹ Ang tanan nga midawat sa ilang kaayohan sumala sa nahisulat nga Pulong, magpamatuod kamo pinaagi sa inyong pagtindog ug mag-ingon, “Nadawat ko na karon ang akong kaayohan pinaagi sa Ngalan ni Jesus Cristo.” Pagtindog kamo.

Dalaygon ang Dios! Tan-awa. Tan-awa n’yo dinhi, ang mga bakol ug mga ingon niana nga mga nakatindog na. Dalaygon Dios! Mao kana. Toohi lamang. Ania Siya. Labihan ka kahibulongan!

¹³² Dinha sa mga tigpaminaw, sa mga anaa sa gawas, pinaagi sa teleponon, kung makita lang gyud unta ninyo! Sa tan-aw ko ang matag tawo nga ania karon, kutob sa nahibaloan ko, o halos silang tanan, nanindog na niining higayona mismo. Oh, pagkamaanindto nga higayon! Ang Presensiya sa Ginoo, mao gyud kana! “Diin gani ang Presensiya sa Ginoo, adunay kalingkawasan, anaay kagawasan.” Ang Espiritu sa Dios nagahatag kanato og kagawasan.

¹³³ Karon nga giayo na ta Niya, ato kining ginatoohan. Giluwas ta Niya; ato kining ginatoohan. Kadtong gusto nga magpabautismo, andam na ang bautismohan. Bisan unsang panahon, bisan unsang oras kung gusto kamo moanhi, adunay moatiman niana.

Ug karon sa akong tan-aw, sa dili pa nato tapuson, atong awiton ang usa ka karaang awit sa simbahan. “Gihigugma ko Siya, Gihigugma ko Siya tungod kay una Siyang nahigugma kanako.” Ibayaw nato ang atong mga kamot ngadto sa Dios ug awiton kini uban sa atong tibuok kasingkasing!

Gusto namong makigkita kaninyo sa buntag, sa mga alas nuebe-traynta, dinhi niining tigumanan, alang sa hilisgotan nga *Kaminyoon Ug Panagbulag*. Sige.

Dungan natong awiton kini karon.

I love Him,

Tugotan natong awiton kini sa daghang mga mananambong karon! Bisan silang mga anaa sa telepono, moawit niini, usab.

Because He first loved me
And purchased my salvation
On Calvary’s tree.

¹³⁴ Asa man kini gibuhat? Didto sa kahoy sa Kalbaryo. Samtang atong awiton kini pag-usab, buot unta kong maglamano hay kamo uban kang bisan kinsa nga anaa sa palibot n’yo, ingna, “Ang Dios magapanalangin kanimo, dumoluong.”

I . . . (. . . ? . . .)
Because He first . . .

And purchased my salvation
On . . .

¹³⁵ Oh, gihigugma ba ninyo Siya? Dili ba pagkahibulongan Niya? Siya ba'y inyong Dapit nga Tagoanan? Siya mao ang Bato didto sa usa ka yutang malaay, ang Salipdanan sa panahon sa bagyo, ang bugtong Dalangpanan nga akong nahibaloan. Busa:


Ang akong pagtoo nagalaum Kaniya,
Ikaw nga Kordero sa Kalbaryo,
Balaan nga Manluluwas;
Karon dungga ako samtang ako nagaampo,
Kuhaa ang tanan nakong sala,
Tugoti ako sugod niining adlaw
Maimo sa kinatibuk-an!

Atong ibayaw ang atong mga kamot samtang atong awiton kini.

My faith looks up to Thee,
Thou Lamb of Calvary,
O Saviour Divine;
Now hear me while I pray,
Take all my sin away,
Oh let me from this day
Be wholly Thine!

Atong iduko ang atong mga ulo karon samtang atong ihugong kini.

While life's dark maze I tread,
And grief around me spread,
Be Thou my Guide;
Bid darkness turn to day,
Bid darkness turn to day,
Nor let me ever stray
From Thee aside.

Samtang inyong giduko ang inyong mga ulo, ang minahal natong pastor, si Igsoong Orman Neville, mao'y magpapauli na sa mga tumatambong. 

65-0220 Ang Dapit Nga Gipili Sa Dios Sa Pagsimba
Parkview Junior High School
Jeffersonville, Indiana U.S.A.

CEBUANO

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org